


wadah



وادع

OKTOBER ▶ DISEMBER 2018 | MUHARAM ▶ RABIULAWAL 1440





DASAR PENUBUHAN

Yayasan Sultan Haji Hassanal Bolkiah

Menjadi Wadah Amal Jariah Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah dan Ahli Keluarga Baginda.

Sebagai tanda pemedulian dan kasih Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah kepada rakyat Baginda yang sentiasa taat setia kepada Baginda dan Kerajaan Baginda.

Menjadi lambang pembentukan dan perpaduan masyarakat dan Negara Brunei Darussalam yang sejahtera dan makmur serta keharmonian umat manusia antarabangsa mengikut keadaan dan kesesuaian yang diredhai oleh Allah Subhanahu wa Ta'ala.

Hasrat Titah

“ Di Negara Brunei

Darussalam, kemeriahannya Hari Raya Idil Fitri tidak hanya dirasakan dalam lingkungan antara keluarga, sanak saudara dan rakan taulan, tetapi turut juga dikongsi sama oleh seluruh masyarakat dari pelbagai peringkat. Tradisi yang baik ini perlu diteruskan sebagai wadah menyuburkan silaturrahim dan sikap hormat-menghormati.

”

Petikan Titah Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam

Majlis Sambutan Hari Raya Aidilfitri
Anjuran Yayasan Sultan Haji Hassanal Bolkiah
bagi Tahun 1439H / 2018M
pada 21 Syawal 1439
bersamaan 5 Julai 2018



Kandungan



Berita
Perdana

04



Berita
Utama

08



Berita

11



Ihsan

28

Pengerusi Lembaga Pengarah

Yang Berhormat Pehin Datu Lailaraja Mejar Jeneral (B)
Dato Paduka Seri Haji Awang Halbi bin Haji Mohd Yussof

Pengarah Urusan

Dato Paduka Eddie bin Dato Paduka Haji Sunny

Penolong Pengarah Urusan

Awang Haji Musthapa bin Haji Matahir
Awang Haji Puasa bin Haji Jumat
Dayang Hajah Donnaliza binti Abdullah Puasa

Ketua Editor

Dayangku Azami binti Pengiran Haji Ahmad

Editor

Awang Kasyfil Aziz bin Haji Jumat
Pengiran Shah Rizal bin Pengiran Haji Mohd. Said
Pengiran Siti Norkarimah binti Pengiran Anak Haji Hashim

Sumbangan
Amal

30



Kegiatan
Sukarelawan

32



Berita
BKP

34



Aktiviti
DANA

36

Kegiatan
Sekolah

39



Penyumbang Berita

Bahagian Agama Yayasan
Bahagian Kebajikan Yayasan
Bahagian Pendidikan Yayasan
Wadah Amal Sdn Bhd
Sekolah Yayasan
Unit Sukarelawan Yayasan
Badan Kebajikan Pekerja Yayasan
Sekretariat Dana Pengiran Muda Mahkota
Al-Muhtadee Billah Untuk Anak-Anak Yatim

Atur Huruf, Reka Bentuk dan Pencetak

Desimpur Company

Ihsan Foto

Yayasan Sultan Haji Hassanal Bolkiah
Jabatan Penerangan, Jabatan Perdana Menteri

Penerbit

Yayasan Sultan Haji Hassanal Bolkiah
Jalan Perdana Menteri, Bandar Seri Begawan BA1151,
Negara Brunei Darussalam

Membangun Modal Insan Berkualiti

Negara Brunei Darussalam mengutamakan pembangunan modal insan yang berkualiti bagi pembangunan ekonomi yang mampan, berterusan dan dinamik serta mendukung usaha dalam merealisasikan Wawasan Brunei 2035 ke arah rakyat yang berpendidikan, berkemahiran tinggi dan berjaya.

Modal insan merupakan individu yang berilmu, berkeyakinan, mempunyai nilai murni dan moral yang tinggi, beretika, berbudi pekerti, bersopan santun, berdisiplin, dinamik, inovatif, kreatif, sihat, bersemangat patriotik, adil, progresif, cekal dan berdaya saing. Inilah modal insan yang memiliki personaliti unggul. Mereka lah yang akan menentukan hala tuju negara pada masa depan.

Bagaimanakah modal insan dapat dibangunkan? Usaha-usaha pembangunan yang dilakukan perlulah secara menyeluruh iaitu meliputi keperluan jasmani, kognitif, emosi dan juga spiritual. Aspek-aspek ini perlu dibangunkan secara seimbang.

Langkah untuk melahirkan modal insan yang berkualiti ialah memperluas akses kepada pendidikan berkualiti. Kerajaan Kebawah Duli Yang Maha Mulia telah mengenalkan pelbagai program dan menyediakan peruntukan yang banyak dalam memastikan bidang pendidikan dapat melahirkan modal insan berkualiti.

Yayasan Sultan Haji Hassanal Bolkiah (Yayasan) juga turut mengendalikan beberapa program pembangunan modal insan bagi melahirkan generasi yang berilmu pengetahuan yang seterusnya akan berperanan terhadap kemajuan dan pembangunan negara seperti Skim Biasiswa Sultan's Scholar. Penyediaan biasiswa Sultan's

Scholar bertujuan untuk melahirkan pemimpin yang cemerlang, menyumbang kepada pembangunan sosial dan ekonomi negara serta menjadi generasi penerus yang akan membarisi tampuk kepimpinan yang akan menerajui Negara Brunei Darussalam ke arah yang lebih sejahtera dengan mengekalkan cara hidup kebruneian yang taat beragama dan setia kepada Raja dan pemimpin selaras dengan falsafah Melayu Islam Beraja (MIB).

Sambutan Hari Raya Aidilfitri 1439/2018 Anjuran Yayasan juga telah mengetengahkan modal insan iaitu terdiri daripada seramai 1,600 orang lepasan graduan institusi pengajian tinggi yang terdiri daripada anak-anak tempatan dan mempunyai kelulusan dalam bidang-bidang tertentu serta berpotensi untuk menyumbang kepada peningkatan produktiviti di sektor swasta sesuai dengan tema sambutan iaitu "Memajukan Ekonomi Negara Dengan Memperkasa Sektor Swasta".

Yayasan juga menyokong program pembangunan modal insan dengan mempertingkatkan penglibatan dan penyertaan belia dalam pembangunan masyarakat. Yayasan bersama Kementerian Kebudayaan, Belia dan Sukan menjadi penyokong utama bagi penganjuran konvensyen kepimpinan belia iaitu Konvensyen Pemimpin Muda Brunei "Brunei Young Leader Convention - BYLC" yang julung kalinya diadakan pada Ogos 2018.

Yayasan setentunya akan terus mengusahakan program dan menyokong usaha kerajaan dan semua pihak ke arah membangun modal insan yang berkualiti sejajar dengan agenda pembangunan negara bagi mencapai Wawasan Brunei 2035. ■

Dayangku Azami binti Pengiran Haji Ahmad

Ketua Editor

Development of Quality Human Capital

Brunei Darussalam places great importance on the development of quality human capital in its efforts to create a robust, dynamic and strong economy. This is part of its effort towards achieving Brunei's Vision 2035 whereby its citizens are highly skilled, educated and successful.

Quality human capital comprise individuals who are knowledgeable, skillful, confident, possess traits such as high moral standards, ethical code of conduct, discipline, respectful, patriotic, just, progressive, relentless and competitive. These attributes are marks of excellent human capital, critical in paving the future of the country.

How would such human capital be developed? A more holistic approach is required encompassing all aspects physical, cognitive emotional and spiritual. It is important that there is a balance in development of all these aspects.

One of the steps towards achieving this human capital development goal is by broadening access to quality education. The government of His Majesty has allocated a large financial sum and spearheaded various efforts and programmes in meeting this objective.

Yayasan Sultan Haji Hassanal Bolkiah [Yayasan] plays its role in developing the nation's human capital through various programmes. Among the programmes introduced by Yayasan is the Sultan's Scholar

Scholarship scheme. The motive of the programme is to develop future leaders who are exceptional and will be able to contribute significantly to the socioeconomic development of the country. These individuals will be our front line leaders, leading Brunei Darussalam towards a better and brighter future while maintaining the Bruneian way of life in line with the Malay Islamic Monarchy [MIB] philosophy.

The Aidilfitri Celebration 1439/2018 organised by Yayasan echoed this aspiration. A total of 1,600 local graduates from various institutions of higher learning, each equipped with skills and knowledge in their respective fields are highlighted as participants. These graduates have the potential to contribute to and amplify private sector productivity in line with the theme of the celebration, *'Empowering the Private Sector for Economic Development'*.

Yayasan has also supported human capital development programmes by way of boosting youth participation. One such event was the Brunei Young Leaders Convention - BYLC held in August 2018, for which Yayasan and the Ministry of Culture, Youth and Sports worked together as the main event supporters.

Yayasan will continue to create opportunities, develop and conduct programmes in support for the government's efforts, by working in close partnership with relevant stakeholders in developing quality human capital in line with the national development agenda towards realising Brunei's Vision 2035. ■

Dayangku Azami binti Pengiran Haji Ahmad

Editor-in-Chief

Sambutan Hari Raya Aidilfitri anjuran Yayasan Mempertemukan Syarikat Sektor Swasta dengan Lepasan Graduan dalam Usaha Memajukan Ekonomi Negara



Dengan limpah kurnia titah perkenan Kebawah Duli Yang Maha Mulia Paduka Seri Baginda Sultan Haji Hassanal Bolkiah Muizzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam, Yayasan Sultan Haji Hassanal Bolkiah (Yayasan) mengetengahkan para lepasan graduan institusi pengajian tinggi yang berpotensi membantu memperkasa sektor swasta dengan kelulusan dan bidang pengajian

mereka, dan syarikat-syarikat swasta termasuk *Government-Linked Companies* (GLC) yang memerlukan perkhidmatan lepasan graduan tempatan bagi memajukan dan mengembangkan syarikat mereka sebagai peserta di Majlis Sambutan Hari Raya Aidilfitri 1439/2018 Anjuran Yayasan

Majlis Sambutan Hari Raya Aidilfitri Anjuran Yayasan tahun ini adalah merupakan kali ke-15 sejak ia mula diadakan pada tahun 2003. Majlis berlangsung pada 21 Syawal

1439 bersamaan 5 Julai 2018 bertempat di Pusat Persidangan Antarabangsa Berakas. Tema sambutan tahun ini ialah *'Memajukan Ekonomi Negara Dengan Memperkasa Sektor Swasta'*.

Di majlis tersebut, Yayasan mengaturkan pertemuan di antara 283 buah syarikat swasta di negara ini yang menyediakan peluang pekerjaan dengan seramai 1600 orang lepasan graduan institusi pengajian tinggi yang terdiri daripada

anak-anak tempatan yang berpotensi untuk menyumbang kepada peningkatan produktiviti di sektor swasta yang diharapkan dapat memberikan impak yang positif dalam menangani isu penyediaan peluang pekerjaan.

Lepasan graduan institusi pengajian tinggi yang terdiri daripada anak-anak tempatan ini mempunyai kelulusan dalam bidang-bidang tertentu seperti pembangunan dan kejuruteraan, perbankan dan kewangan.

“ Sektor swasta di mana-mana saja, memang sudah lama dikenali sebagai jentera penggerak kepada pertumbuhan ekonomi. Di negara kita juga tidak kurang mempunyai bisnes yang *resilient* yang sudah lama wujud mendepani cabaran membina ekonomi itu. Jentera ini tentu saja memerlukan bahan api untuk ia berfungsi. Bahan api tersebut tidak lain ialah tenaga kerja yang berkualiti. ”



ICT, pendidikan, kesihatan, hospitaliti dan pelancongan, perniagaan dan sebagainya. Manakala syarikat-syarikat swasta termasuk *Government-Linked Companies* (GLC) pula memerlukan perkhidmatan lepasan graduan tempatan bagi memajukan dan mengembangkan syarikat mereka.

Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam berkenan mengurniakan titah mengenai sokongan

Yayasan dalam membantu sektor swasta dan para lepasan graduan untuk saling membantu di antara satu dengan yang lain bagi memperkasa diri masing-masing.

“Sektor swasta di mana-mana saja, memang sudah lama dikenali sebagai jentera penggerak kepada pertumbuhan ekonomi. Di negara kita juga tidak kurang mempunyai bisnes yang “resilient” yang sudah lama wujud mendepani cabaran membina ekonomi itu. Jentera ini tentu saja

memerlukan bahan api untuk ia berfungsi. Bahan api tersebut tidak lain ialah tenaga kerja yang berkualiti.”

Baginda seterusnya bertitah, *“Masing-masing mereka tak syak lagi boleh menyumbang bagi merealisasikan pembangunan ekonomi negara, sehingga ke tahap dapat dinikmati oleh semua lapisan rakyat dan penduduk di negara ini.”*

“ Masing-masing mereka tak syak lagi boleh menyumbang bagi merealisasikan pembangunan ekonomi negara, sehingga ke tahap dapat dinikmati oleh semua lapisan rakyat dan penduduk di negara ini. ”



Majlis tersebut dihasratkan sebagai platform yang akan dapat mempertemukan dan memudah cara pertemuan di antara kedua belah pihak iaitu para pencari pekerjaan dan yang menawarkan pekerjaan untuk menjalinkan silaturahim dan mengenali secara dekat antara mereka bagi memudahkan penawaran dan penerimaan pekerjaan.

Sesuai dengan tema sambutan, pihak swasta dihasratkan untuk menjadi lebih berperanan penting dalam sama-sama menjana kemajuan ekonomi khususnya dengan kepakaran anak-anak tempatan. Lebih penting lagi sektor swasta juga akan

dapat mendukung harapan negara melalui Wawasan Brunei 2035 bagi mencapai status rakyat yang berpendidikan, berkemahiran dan berjaya melalui pembangunan sumber tenaga manusia yang menyumbang kepada keperluan negara.

Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam dan Kebawah Duli Yang Maha Mulia Paduka Seri Baginda Raja Isteri Pengiran Anak Hajah Saleha binti Al-Marhum Pengiran Pemancha Pengiran

Anak Haji Mohamed Alam berkenan berangkat bercemar duli ke majlis bersama-sama ahli-ahli Kerabat Diraja.

Ahli-ahli Kerabat Diraja yang turut berangkat sama ke majlis tersebut ialah Duli Yang Teramat Mulia Paduka Seri Pengiran Muda Mahkota Pengiran Muda Haji Al-Muhtadee Billah, Menteri Kanan di Jabatan Perdana Menteri dan Yang Teramat Mulia Paduka Seri Pengiran Anak Isteri Pengiran Anak Sarah binti Pengiran Haji Salleh Ab. Rahaman; Duli Yang Teramat Mulia Paduka Seri Pengiran Muda 'Abdul Malik, Pengerusi Jemaah Tadbir Yayasan Sultan Haji Hassanal Bolkiah dan Yang Amat Mulia



Pengiran Anak Isteri Pengiran Raabi'atul Adawiyyah binti Pengiran Haji Bolkiah; Duli Yang Teramat Mulia Paduka Seri Pengiran Perdana Wazir Sahibul Himmah Wal-Waqar Pengiran Muda Mohamed Bolkiah; Duli Yang Teramat Mulia Paduka Seri Pengiran Digadong Sahibul Mal Pengiran Muda Haji Jefri Bolkiah; Yang Teramat Mulia Paduka Seri Pengiran Anak Puteri Hajah Masna dan Yang Teramat Mulia Paduka Seri Pengiran Anak Puteri Hajah Amal Umi Kalthum Al-Islam.

Selain daripada titah Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah,

Sultan dan Yang Di-Pertuan Negara Brunei Darussalam, acara yang ditunggu-tunggu oleh para peserta ialah perkenan Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien. Sultan dan Yang Di-Pertuan Negara Brunei Darussalam dan Kebawah Duli Yang Maha Mulia Paduka Seri Baginda Raja Isteri Pengiran Anak Hajah Saleha binti Al-Marhum Pengiran Pemancha Pengiran Anak Haji Mohamed Alam untuk menerima junjung ziarah dan beramah mesra dengan semua peserta yang hadir. Di samping memberi kesempatan kepada para peserta untuk menjunjung

kasih ke hadapan majlis Baginda berdua, kesempatan ini juga memberi peluang kepada peserta untuk beramah mesra dengan raja yang sangat dikesih.

Dalam majlis tersebut sebanyak 24 buah syarikat swasta menyertai pameran mengenai peluang kerjaya dan insentif yang ditawarkan oleh syarikat masing-masing kepada anak-anak tempatan. Pameran ini dibukakan kepada orang ramai selama sehari bagi memberikan kesempatan kepada para lepasan graduan untuk mendapatkan maklumat mengenai kerjaya yang ditawarkan oleh pihak swasta yang menyertai pameran tersebut. ■



Tingkatkan Pembangunan Kapasiti Tenaga Manusia melalui Biasiswa Sultan's Scholar

Biasiswa Sultan's Scholar Yayasan Sultan Haji Hassanal Bolkiah adalah merupakan biasiswa yang berprestij dan dianugerahkan kepada penuntut-penuntut yang telah dikenalpasti oleh Yayasan Sultan Haji Hassanal Bolkiah, Kementerian Pendidikan dan Kementerian Hal Ehwal Ugama sebagai penuntut yang cemerlang dalam bidang akademik dan kegiatan luar sekolah bagi melanjutkan pengajian mereka ke peringkat sarjana muda sehingga ke peringkat yang lebih tinggi dalam pelbagai bidang di institusi-institusi pengajian tinggi yang berprestij di luar negara yang dibenarkan oleh Yayasan

dan diiktiraf oleh Kerajaan Kebawah Duli Yang Maha Mulia.

Penganugerahan biasiswa Sultan's Scholar ini adalah merupakan penglibatan Yayasan terhadap program pembangunan kapasiti tenaga manusia bagi melahirkan generasi yang berilmu pengetahuan yang seterusnya akan berperanan terhadap kemajuan dan pembangunan negara. Usaha ini adalah bagi merealisasikan Wawasan Brunei 2035 ke arah melahirkan rakyat yang berpendidikan, berkemahiran tinggi dan berjaya bagi mencapai taraf kehidupan yang berkualiti tinggi. Biasiswa Sultan's

Scholar bertujuan untuk melahirkan pemimpin yang cemerlang, menyumbang kepada pembangunan sosial dan ekonomi negara serta menjadi generasi penerus yang akan membarisi tumpuk kepimpinan bagi kepentingan Agama, Raja dan Negara.

Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Dipertuan Negara Brunei Darussalam telah memperkenankan bagi pengurnian Biasiswa Sultan's Scholar Yayasan



Sultan Haji Hassanal Bolkiah bagi Sesi Pengajian 2018/2019 kepada tiga orang pelajar. Baginda telah berkenan berangkat menyempurnakan penganugerahan biasiswa tersebut pada 25 Zulhijjah 1439 bersamaan 6 September 2018 bertempat di Istana Nurul Iman, Negara Brunei Darussalam.

Seorang penuntut telah berjaya menerima anugerah biasiswa Sultan's Scholar Yayasan Sultan Haji Hassanal Bolkiah bagi sesi pengajian 2018/2019 iaitu Awang Abdul Qayyum bin Haji Isa. Manakala dua orang penuntut menerima anugerah

biasiswa Sultan's Scholar Yayasan Sultan Haji Hassanal Bolkiah bagi meninggikan tahap pengajian iaitu Awang Muhammad Nasruddin bin Haji Sulaiman dan Dayang Hajah Hafizah binti Dato Paduka Haji Mohd Nor.

Awang Abdul Qayyum bin Haji Isa adalah lepasan penuntut Sekolah Menengah Arab Laki-Laki Hassanal Bolkiah. Melalui biasiswa Sultan's Scholar, beliau akan meneruskan pengajian ke peringkat sarjana muda dalam jurusan Bahasa Arab di Universiti Al-Azhar, Mesir.

“ Penganugerahan biasiswa Sultan's Scholar ini adalah merupakan penglibatan Yayasan terhadap program pembangunan kapasiti tenaga manusia bagi melahirkan generasi yang berilmu pengetahuan yang seterusnya akan berperanan terhadap kemajuan dan pembangunan negara. ”





Sementara itu, Dayang Hajah Hafizah binti Dato Paduka Haji Mohd Nor telah menerima Anugerah Biasiswa Sultan's Scholar Yayasan Sultan Haji Hassanal Bolkiah pada 8 Zulkaedah 1434 bersamaan 14 September 2013 dan lulus dengan memperolehi Kepujian Kelas Kedua Atas dalam bidang Seni Bina (*Architecture*) di University of Cambridge, United Kingdom. Dayang Hajah Hafizah seterusnya menerima biasiswa bagi meninggikan tahap pengajian ke peringkat Sarjana dalam bidang Seni Bina/*Architecture - Royal Institute of British Architects - RIBA* di Architectural Association School of Architecture, United Kingdom.

Awang Muhammad Nasruddin bin Haji Sulaiman pula telah menerima Anugerah Biasiswa Sultan's Scholar Yayasan Sultan Haji Hassanal Bolkiah pada 25 Zulkaedah 1435 bersamaan 20 September 2014 dan lulus dengan memperolehi Kepujian Kelas Pertama dalam bidang Kimia (*Chemistry*) di University of Oxford, United Kingdom. Awang Muhammad Nasruddin seterusnya menerima biasiswa bagi meninggikan tahap pengajian ke peringkat Doktor Falsafah

[PhD] dalam bidang Kajian Kimia (*Chemistry Research*) di Imperial College London, United Kingdom.

Berangkat sama ke Majlis Penganugerahan Biasiswa Sultan's Scholar Yayasan Sultan Haji Hassanal Bolkiah Bagi Sesi Pengajian 2018/2019 ialah Duli Yang Teramat Mulia Paduka Seri Pengiran Muda Mahkota Pengiran Muda Haji Al-Muhtadee Billah, Menteri Kanan di Jabatan Perdana Menteri; Duli Yang Teramat Mulia Paduka Seri Pengiran Muda 'Abdul Malik, Pengurus Jemaah Tadbir Yayasan Sultan Haji Hassanal Bolkiah dan Duli Yang Teramat Mulia Paduka Seri Pengiran Muda 'Abdul Mateen. Turut hadir di majlis tersebut ialah ahli-ahli Jemaah Tadbir Yayasan, Pengurus dan ahli-ahli Lembaga Pengarah Yayasan, Setiausaha-Setiausaha Tetap di Kementerian Pendidikan dan Kementerian Hal Ehwal Ugama, ahli-ahli Jawatankuasa Pandu Bagi Perlaksanaan Skim Biasiswa Sultan's Scholar, ahli-ahli Jawatankuasa Kerja Bagi Pelaksanaan Skim Biasiswa Sultan's Scholar, pegawai-pegawai kanan Jabatan Kerajaan yang berkenaan dan

pegawai-pegawai kanan Yayasan, Pengetua-Pengetua dan sebahagian penuntut dari institusi-institusi tingkatan enam di seluruh negara.

Sebelum berangkat meninggalkan majlis, Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam dan paduka-paduka anakanda Baginda berkenan bergambar ramai dan beramah mesra dengan penerima-penerima anugerah biasiswa Sultan's Scholar dan para ibu bapa mereka serta para jemputan.

Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam mula memperkenankan penganugerahan Biasiswa Sultan's Scholar pada tahun 2006 iaitu bagi sesi pengajian tahun 2006/2007. Sehingga tahun 2017, seramai 46 orang pelajar telah menerima anugerah ini. Sebahagian daripada mereka telah menamatkan pengajian dan berkhidmat sebagai tenaga profesional dan eksekutif di sektor kerajaan dan swasta.

Bermula pada tahun 2013, Yayasan telah memperluaskan skim biasiswa Sultan's Scholar untuk skim meninggikan tahap pengajian sehingga ke peringkat Doktor Falsafah. Sehingga tahun 2018, seramai lima orang pelajar menerima biasiswa bagi melanjutkan pengajian ke peringkat Doktor Falsafah dan lima orang lagi menerima biasiswa bagi meninggikan tahap pengajian ke peringkat Sarjana. ■



Ramah Mesra Sempena Hari Puja Usia Kebawah Duli Yang Maha Mulia ke-72

Bagi menzahirkan sembah kesyukuran dan taat setia Kehadapan Majlis Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam, warga kerja Yayasan Sultan Haji Hassanal Bolkiah telah turut serta bersama-sama ribuan rakyat dan penduduk dari Daerah Brunei dan Muara di Majlis Ramah Mesra dan Junjung Ziarah Bersama Rakyat dan Penduduk sempena Sambutan Hari Puja Usia Baginda Ke-72 pada 16 Zulkaedah 1439 bersamaan 29 Julai 2018 bertempat di Taman Haji Sir Muda Omar 'Ali Saifuddien di Bandar Seri Begawan.

Keberangkatan Kebawah Duli Yang Maha Mulia bercemar Duli ke Majlis Ramah Mesra dan Junjung Ziarah tersebut membuktikan dan mencerminkan sifat kepimpinan serta pemeliharaan dan tanda kasih sayang Baginda terhadap rakyat jelata. Majlis Ramah Mesra dan Junjung Ziarah merupakan saat yang sememangnya dinanti-nantikan dan memberi peluang keemasan kepada

“ Majlis Ramah Mesra dan Junjung Ziarah merupakan saat yang sememangnya dinanti-nantikan dan memberi peluang keemasan kepada segenap lapisan rakyat dan penduduk untuk beramah mesra dengan Raja yang dikasihi. ”

segenap lapisan rakyat dan penduduk untuk beramah mesra dengan Raja yang dikasihi.

Seluruh warga kerja Yayasan menyembahkan rasa syukur sempena Sambutan Hari Puja

Usia Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam Ke-72 dan seterusnya mendoakan semoga Baginda dilanjutkan usia dan sentiasa berada dalam perlindungan dan keredaan Allah Subhanahu wa Ta'alaa, sihat walafiat, sejahtera, serta kekal karar memerintah turun-temurun di atas takhta singgahsana Kerajaan dan Negara Brunei Darussalam dalam keadaan aman dan damai dengan rahmat, taufik dan inayah Allah Subhanahu wa Ta'alaa.

Yayasan ditubuhkan sebagai wadah amal jariah Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam dan ahli Kerabat Diraja Baginda. Penubuhan Yayasan adalah sebagai tanda pemedulian dan kasih Baginda kepada rakyat dan penduduk di Negara Brunei Darussalam dan sebagai lambang pembentukan dan perpaduan masyarakat yang sejahtera dan makmur. ■



Pengurniaan Pakaian Ihram bagi Bakal Jemaah Haji

Ibadah haji adalah salah satu rukun Islam yang lima. Menunaikan ibadah haji adalah wajib bagi orang Islam yang berkemampuan serta telah memenuhi syarat.

Seramai 1,041 orang bakal jemaah haji Negara Brunei Darussalam bagi musim

haji tahun 1439/2018 menerima kurnia peribadi Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien. Sultan dan Yang Di-Pertuan Negara Brunei Darussalam dalam bentuk pakaian ihram dan telelung.

Seramai 512 orang bakal jemaah haji lelaki menerima kurnia pakaian ihram dan seramai 529 orang bakal jemaah haji wanita menerima kurnia telelung.

Pembahagian pakaian ihram dan telelung kurnia peribadi Kebawah Duli Yang Maha Mulia Paduka Seri Baginda Sultan





dan Yang Di-Pertuan Negara Brunei Darussalam diadakan semasa Majlis Mengadap dan Junjung Ziarah Bakal-Bakal Jemaah Haji Negara Brunei Darussalam bagi tahun 1439/2018 Kehadapan Majlis Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien. Sultan dan Yang Di-Pertuan Negara Brunei Darussalam dan Kebawah Duli Yang Maha Mulia Paduka Seri Baginda Raja Isteri Pengiran Anak

Hajah Saleha binti Al-Marhum Pengiran Pemancha Pengiran Anak Haji Mohamed Alam yang diadakan pada 5 Zulkaedah 1439 bersamaan 18 Julai 2018 bertempat di Istana Nurul Iman, Bandar Seri Begawan.

Berangkat sama di majlis tersebut ialah Duli Yang Teramat Mulia Paduka Seri Pengiran Muda Mahkota Pengiran Muda Haji Al-Muhtadee Billah ibni Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Menteri Kanan di Jabatan

Perdana Menteri dan Yang Teramat Mulia Paduka Seri Pengiran Anak Isteri Pengiran Anak Sarah binti Pengiran Haji Salleh Ab. Rahaman.

Yayasan Sultan Haji Hassanal Bolkiah mengendalikan pembelian pakaian ihram dan telekung kurnia peribadi Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam untuk diagihkan kepada semua bakal jemaah haji Negara Brunei Darussalam pada setiap tahun. ■

“Ibadah haji adalah salah satu rukun Islam yang lima. Menunaikan ibadah haji adalah wajib bagi orang Islam yang berkemampuan serta telah memenuhi syarat.**”**



Lawatan Kerja Pengerusi Jemaah Tadbir Yayasan ke Kampong Bolkiah dan Kompleks Yayasan

Duli Yang Teramat Mulia Paduka Seri Pengiran Muda 'Abdul Malik ibni Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah selaku Penegerusi Jemaah Tadbir Yayasan Sultan Haji Hassanal Bolkiah sangat memberi perhatian terhadap apa jua rancangan strategik dan perkembangan projek yang diusahakan oleh Yayasan Sultan Haji Hassanal Bolkiah. Atas keprihatinan tersebut, Duli Yang Teramat Mulia Paduka Seri Pengiran Muda 'Abdul Malik telah membuat lawatan kerja ke Skim Perumahan Yayasan Sultan Haji Hassanal Bolkiah di Kampong Bolkiah 'A' dan Kampong Bolkiah 'B' dan Kompleks Yayasan Sultan Haji Hassanal Bolkiah pada bulan Oktober 2018.



Lawatan Kerja ke Skim Perumahan Yayasan Kampong Bolkiah

Duli Yang Teramat Mulia Paduka Seri Pengiran Muda 'Abdul Malik, Penegerusi Jemaah Tadbir Yayasan berkenan berangkat membuat lawatan kerja ke Skim Perumahan Yayasan di Kampong Bolkiah 'A' dan Kampong Bolkiah 'B'. Mukim Sungai Kebun pada 1 Safar 1440 bersamaan 10 Oktober 2018. Keberangkatan Duli Yang Teramat Mulia ke Skim Perumahan Yayasan di Kampong Bolkiah ini mencerminkan keprihatinan Duli Yang Teramat Mulia terhadap kebijakan dan kesejahteraan penduduk Kampong Bolkiah 'A' dan Kampong Bolkiah 'B'.

Keberangkatan Duli Yang Teramat Mulia Paduka Seri Duli Pengiran Muda 'Abdul Malik dijunjung oleh Yang Berhormat Pehin Datu Lailaraaja Mejari Jeneral (B) Dato Paduka Seri Haji Awang Halbi bin Haji Md Yussof, Penegerusi Lembaga Pengarah Yayasan dan Yang Berhormat Dato Seri Setia Dr. Awang Haji Mohd Amin Liew bin Abdullah. Timbalan Penegerusi Lembaga Pengarah Yayasan. Turut hadir semasa lawatan kerja ini ialah ahli-ahli Jemaah Tadbir Yayasan dan sebahagian ahli-ahli Lembaga Pengarah Yayasan.

Sebanyak 476 buah rumah dibina dalam Skim Perumahan Kampong Bolkiah dan sehingga kini menempatkan seramai

2,956 orang penduduk kampung. Bagi kesejahteraan dan keselesaan para penduduk, beberapa kemudahan telah disediakan selain kemudahan asas, seperti sebuah masjid iaitu Masjid Yayasan Sultan Haji Hassanal Bolkiah dan sebuah Pos Polis yang terletak di Kampong Bolkiah 'A'; sebuah Klinik Kesihatan dan Sekolah Ugama Sementara yang terletak di Kampong Bolkiah 'B'; sebuah jambatan utama yang menghubungkan Kampong Bolkiah 'A' dan Kampong Bolkiah 'B' dan cawangan pejabat Yayasan di kedua-dua kampung.

Atur cara keberangkatan lawatan Duli Yang Teramat Mulia Penegerusi Jemaah



Tadbir Yayasan bermula di kawasan tapak yang dicadangkan bagi pembinaan bangunan kekal Sekolah Ugama yang terletak di Kampong Bolkiah 'A' iaitu berdekatan dengan Masjid Yayasan Sultan Haji Hassanal Bolkiah. Bangunan ini dihasratkan bagi menyediakan bangunan kekal Sekolah Ugama untuk kegunaan penduduk Kampong Bolkiah dan kawasan sekitarnya. Pada ketika ini anak-anak penduduk Kampong Bolkiah mengikuti pengajian sekolah ugama dengan menggunakan bangunan sementara di Kampong Bolkiah 'B'.

ruang untuk berkongsi kepakaran dan pengetahuan menenun kain tenunan Brunei untuk dipelajari oleh generasi akan datang.

Duli Yang Teramat Mulia Pengurus Jemaah Tadbir Yayasan meneruskan lawatan ke beberapa buah tempat di Kampong Bolkiah 'B' seperti cawangan pejabat Yayasan, perpustakaan mini, klinik kesihatan, sekolah ugama sementara dan balai ibadat Kampong Bolkiah 'B'. Duli Yang Teramat Mulia mengakhiri lawatan di rumah Ketua Kampong Bolkiah 'B' iaitu Awang Shamsuddin bin Haji Maidin.

Acara lawatan di Kampong Bolkiah 'A' diteruskan dengan lawatan ke cawangan pejabat Yayasan yang berfungsi bagi memberikan kemudahan kepada para penduduk membuat urusan dengan Yayasan. Duli Yang Teramat Mulia seterusnya melawat bengkel tenunan yang digunakan oleh penduduk kampung untuk menghasilkan produk kain tenunan Brunei. Perusahaan ini dijadikan sebagai sumber pendapatan mereka di samping sebagai

semasa keberangkatan lawatan kerja tersebut Duli Yang Teramat Mulia juga melawat beberapa buah rumah yang mengalami kerosakan dan beramah mesra dengan penduduk kampung. Duli Yang Teramat Mulia sangat memberi perhatian terhadap usaha Yayasan yang berterusan bagi menangani isu pembisian dan kesejahteraan penduduk di kedua-dua kampung iaitu Kampong Bolkiah 'A' dan Kampong Bolkiah 'B'.





Lawatan Kerja ke Kompleks Yayasan Sultan Haji Hassanal Bolkiah

Duli Yang Teramat Mulia Paduka Seri Pengiran Muda 'Abdul Malik ibni Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Pengurus Jemaah Tadbir Yayasan Sultan Haji Hassanal Bolkiah telah membuat lawatan kerja ke Kompleks Yayasan Sultan Haji Hassanal Bolkiah, Bandar Seri Begawan pada 4 Safar 1440 bersamaan 13 Oktober 2018.

Keberangkatan lawatan kerja Duli Yang Teramat Mulia Paduka Seri Pengiran Muda 'Abdul Malik mencerminkan keprihatinan Duli Yang Teramat Mulia terhadap usaha berterusan Yayasan dalam menangani perkembangan dan isu-isu berkaitan dengan Kompleks Yayasan Sultan Haji Hassanal Bolkiah seperti perancangan untuk meningkatkan pendapatan serta menarik penyewa dan pengunjung ke kompleks tersebut.



Menjunjung keberangkatan Duli Yang Teramat Mulia Paduka Seri Pengiran Muda 'Abdul Malik ialah Yang Berhormat Pehin Datu Lailaraja Mejai Jeneral (B) Dato Paduka Seri Haji Awang Halbi bin Haji Mohd Yussof, Pengurusi Lembaga Pengarah Yayasan; dan Yang Berhormat Dato Seri Setia Awang Haji Suhaimi bin Haji Gafar, ahli Lembaga Pengarah Yayasan yang juga selaku Pengurusi Wadah Amal Sdn Bhd. Turut sama menjunjung keberangkatan Duli Yang Teramat Mulia ialah sebahagian ahli-ahli Lembaga Pengarah Yayasan dan ahli-ahli Lembaga Pengarah Wadah Amal Sdn Bhd.

Kompleks Yayasan Sultan Haji Hassanal Bolkiah merupakan projek pelaburan Yayasan dalam bidang harta tanah di mana sebahagian besar hasil pulangan daripada pelaburan tersebut digunakan bagi membiayai operasi dan projek amal yang dikendalikan oleh Yayasan. Bermula pada akhir tahun 2016, pengurusan Kompleks Yayasan Sultan Haji Hassanal Bolkiah

telah diserahkan kepada Syarikat Wadah Amal Sdn Bhd iaitu sebuah syarikat milik penuh Yayasan. Setakat ini, sebanyak 79 penyewa mengisi ruang Kompleks tersebut iaitu di kawasan Blok A, B, C dan kawasan Basement.

Atur cara lawatan kerja Duli Yang Teramat Mulia Pengurus Jemaah Tadbir Yayasan bermula dengan sembah taklimat mengenai perkembangan terkini Kompleks Yayasan iaitu penerangan mengenai kemasukan kedai-kedai baharu, aktiviti-aktiviti yang telah dan sedang disusun sehingga akhir tahun 2018 serta perancangan perniagaan dalam masa yang terdekat. Taklimat disembah oleh Pengurus Am Wadah Amal Sdn. Bhd. Awang Fazlan bin Haji Othman.

Duli Yang Teramat Mulia Paduka Seri Pengiran Muda 'Abdul Malik seterusnya berangkat melawat ke beberapa buah kedai

yang baharu dibuka di Tingkat Bawah dan Tingkat Satu di kawasan Blok A, B dan C termasuk medan selera The Foodcourt. Duli Yang Teramat Mulia seterusnya berangkat melawat ke surau Kompleks Yayasan Sultan Haji Hassanal Bolkiah di Tingkat Bawah. Blok A iaitu salah satu kemudahan yang disediakan untuk orang ramai.

Atur cara keberangkatan lawatan Duli Yang Teramat Mulia Pengurus Jemaah Tadbir Yayasan diteruskan dengan lawatan ke ruang kosong di kawasan Basement dan Tingkat Bawah Blok E dan seterusnya mendengarkan sembah taklimat daripada pihak Syarikat Wadah Amal Sdn Bhd mengenai perancangan bagi kawasan tersebut. Keberangkatan lawatan kerja Duli Yang Teramat Mulia Pengurus Jemaah Tadbir Yayasan Sultan Haji Hassanal Bolkiah diakhiri dengan santap dan sesi bergambar ramai. ■





Doa Kesyukuran Sempena Ulang Tahun ke-26 Penubuhan Yayasan

Pada 25 Muharam 1440 bersamaan 5 Oktober 2018, Yayasan Sultan Haji Hassanal Bolkiah meraikan ulang tahun penubuhannya yang ke-26 tahun dengan mengadakan Majlis Doa Kesyukuran bertempat di Dewan Serba Guna, Kompleks Yayasan Sultan Haji Hassanal Bolkiah, Bandar Seri Begawan.

Duli Yang Teramat Mulia Paduka Seri Pengiran Muda Abdul Malik ibni Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah. Pengerusi Jemaah Tadbir Yayasan Sultan Haji Hassanal Bolkiah berkenan berangkat ke majlis tersebut.

Majlis dimulakan dengan sembahyang Fardu Maghrib berjemaah yang diimamkan

oleh Yang Berhormat Pehin Orang Kaya Paduka Seri Utama Dato Paduka Seri Setia Haji Awang Salim bin Haji Besar, Ketua Hakim Syarie, Mahkamah Syariah. Atur cara majlis diikuti dengan bacaan Surah Yasin beramai-ramai dan bacaan Doa Kesyukuran sempena 26 tahun penubuhan Yayasan. Majlis diteruskan dengan sembahyang Fardu Isyak berjemaah.

Majlis Doa Kesyukuran tersebut dihadiri oleh ahli-ahli Jemaah Tadbir Yayasan; Pengerusi dan ahli-ahli Lembaga Pengarah Yayasan; ahli-ahli Lembaga Pemegang Amanah Dana Pengiran Muda Mahkota Al-Muhtadee Billah Untuk Anak-Anak Yatim; pegawai-pegawai dan kakitangan Yayasan serta guru-guru Sekolah Yayasan.

Yayasan ditubuhkan atas titah perkenan Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam pada 7 Rabiulakhir 1413 bersamaan 5 Oktober 1992 sempena Sambutan Jubli Perak Baginda Menaiki Takhta. Penubuhan Yayasan adalah sebagai wadah amal jariah atau derma khairat Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah dan Ahli Kerabat Baginda iaitu sebagai tanda pemedulian dan kasih Baginda kepada rakyat Baginda serta menjadi pembentukan masyarakat di Negara Brunei Darussalam yang sejahtera dan makmur. ■



Meterai Perjanjian dan Penyampaian Insentif bagi Penerima Biasiswa Sultan's Scholar



Skim Biasiswa Sultan's Scholar Yayasan Sultan Haji Hassanal Bolkiah adalah merupakan salah satu program pembangunan kapasiti tenaga manusia yang dilaksanakan oleh Yayasan bagi melahirkan generasi yang berilmu pengetahuan yang seterusnya akan berperanan terhadap kemajuan dan pembangunan negara sejajar dengan Wawasan Brunei 2035 ke arah rakyat berpendidikan dan berkemahiran tinggi dan kehidupan rakyat berkualiti tinggi. Mereka ini diharapkan akan menjadi pelapis pemimpin dalam pelbagai bidang dan sektor.

Seramai seorang penuntut yang menerima anugerah biasiswa Sultan's Scholar bagi sesi pengajian 2018/2019 dan dua orang penuntut yang menerima anugerah biasiswa Sultan's Scholar bagi meninggikan tahap pengajian bagi sesi pengajian 2018/2019

telah memeterai perjanjian dengan Yayasan di Majlis Menandatangani Perjanjian dan Doa Selamat Bagi Penerima Anugerah Biasiswa Sultan's Scholar Yayasan Sultan Haji Hassanal Bolkiah bagi sesi pengajian tahun 2018/2019. Mereka ialah Awang Abdul Qayyum bin Haji Isa, Awang Muhammad Nasruddin bin Haji Sulaiman dan Dayang Hajah Hafizah binti Dato Paduka Haji Mohd Nor. Majlis diadakan pada 25 Zulhijah 1439 bersamaan 6 September 2018 bertempat di Dewan Serba Guna, Kompleks Yayasan Sultan Haji Hassanal Bolkiah, Bandar Seri Begawan.

Hadir selaku tetamu kehormat bagi menyaksikan Majlis Menandatangani Perjanjian tersebut ialah Yang Berhormat Pehin Datu Lailaraja Mejar Jeneral (B) Dato Paduka Seri Haji Awang Halbi bin Haji Mohd. Yussof, Pengurus Lembaga Pengarah, Yayasan Sultan Haji Hassanal Bolkiah.

Ketiga-tiga orang penuntut yang berjaya menerima anugerah basiswa Sultan's Scholar Yayasan Sultan Haji Hassanal Bolkiah Bagi Sesi Pengajian 2018/2019 menandatangani perjanjian bersama dengan dua orang penjamin yang terdiri daripada ahli keluarga masing-masing. Bagi pihak Yayasan, penandatanganan dilakukan oleh Dato Paduka Eddie bin Dato Paduka Haji Sunny. Pengarah Urusan Yayasan bersama dengan Dayang Hajah Donnaliza binti Abdullah Puasa, Penolong Pengarah Urusan Yayasan. Majlis Menandatangani Perjanjian tersebut disaksikan oleh Yang Berhormat Pehin Datu Lailaraja Mejar Jeneral (B) Dato Paduka Seri Haji Awang Halbi bin Haji Mohd. Yussof, Pengerusi Lembaga Pengarah, Yayasan Sultan Haji Hassanal Bolkiah.

Yayasan menaruh harapan yang tinggi agar para penerima anugerah basiswa Sultan's Scholar untuk terus memperolehi kejayaan dalam bidang pengajian mereka dan seterusnya dapat menyumbangkan khidmat bakti dan memberikan perkhidmatan terbaik kepada masyarakat, bangsa, agama dan negara setelah mereka menamatkan pengajian nanti.

Di majlis tersebut, Yayasan juga menyempurnakan penyampaian insentif kepada dua orang penerima basiswa Sultan's Scholar yang telah mendapat Keputusan cemerlang dalam pengajian dengan mendapat Kepujian Kelas Pertama. Mereka ialah Awang Muhammad Nasruddin bin Haji Sulaiman yang mendapat Kepujian Kelas Pertama [First Class Honors - MChem] dalam bidang Kimia (*Chemistry*) dari University of Oxford, United Kingdom dan Dayang Rasyiqah Azimah binti Muhammad Nuraiziz yang mendapat Kepujian Kelas Pertama [First Class Honors - BSc] dalam bidang Sains Semulajadi (*Natural Sciences*) dari University College London, United Kingdom. Yang Berhormat Pehin Datu Lailaraja Mejar Jeneral (B) Dato Paduka Seri Haji Awang Halbi bin Haji Mohd. Yussof, Pengerusi Lembaga Pengarah, Yayasan Sultan Haji Hassanal Bolkiah menyampaikan insentif tersebut.



Doa Selamat dibacakan oleh Awang Haji Mohd Azrol Alim bin Haji Zaini, Pegawai Hal Ehwal Masjid, Masjid Kampong Pintu Malim untuk memohon keberkatan bagi para penerima anugerah basiswa Sultan's Scholar yang akan bertolak dari Negara Brunei Darussalam ke destinasi pengajian masing-masing.

Turut hadir di majlis ini ialah sebahagian ahli-ahli Lembaga Pengarah Yayasan, ahli-ahli Jawatankuasa Pandu Bagi Pelaksanaan Skim Biasiswa Sultan's Scholar Yayasan, ahli-ahli Jawatankuasa Kerja Bagi Perlaksanaan Skim Biasiswa Sultan's Scholar Yayasan, para ibu bapa dan ahli keluarga penerima anugerah, serta pegawai dan kakitangan Yayasan. ■





Membuka tirai strategi baru pemasaran Kompleks Yayasan Sultan Haji Hassanal Bolkiah, satu majlis pembukaan 14 buah kedai baharu dan pelancaran laman web serta facebook dan instagram Kompleks Yayasan telah diadakan pada 4 Muharam 1440 bersamaan 14 September 2018.

Hadir selaku tetamu kehormat dan melancarkan majlis tersebut ialah Yang Berhormat Dato Seri Setia Awang Haji Suhaimi bin Haji Gafar, ahli Lembaga Pengarah Yayasan Sultan Haji Hassanal Bolkiah.

Dengan slogan "Yayasan Shopping Complex: Rediscover A Great Shopping Tradition", Kompleks Yayasan kini kembali menjadi tarikan peniaga dan pengunjung.

Kedai-kedai baharu yang dirasmikan ialah BWN Souvenirs Store, Qaisara Dreams, Gildan USA, Mommymart, ViVO Concept Store, Arum, Aura Rich Enterprise, Oud Al Aswad, HIVE Enterprise, Ukhluwwah Venture, Neven Legacy Resources, Maanggaris Enterprise, Koleksi Husna dan An Nuur As Salwa Beauty & Health Establishment. Majoriti kedai-kedai baharu tersebut dimiliki oleh pengusaha muda tempatan dan menjual pelbagai produk tempatan.



Kompleks Yayasan adalah merupakan salah satu projek pembangunan infrastruktur Yayasan. Pengurusan Kompleks Yayasan dikendalikan oleh Syarikat Wadah Amal Sdn. Bhd. iaitu sebuah syarikat milik penuh Yayasan.

Tersergam indah di suatu kawasan strategik di antara dua mercu tanda utama Bandar Seri Begawan iaitu Sungai Brunei dan Masjid Omar Ali Saifuddien. Kompleks Yayasan merupakan tarikan kepada orang ramai dan para pelancong.

Maklumat lanjut mengenai Kompleks Yayasan boleh didapatkan dari laman web www.yayasancomplex.com; facebook The Yayasan Shopping Complex; dan instagram The Yayasan Complex. ■



Sembahyang Sunat Hajat Berjemaah bagi Pelajar Kelas Tuisyen PIP

Yayasan Sultan Haji Hassanal Bolkiah menganjurkan Sembahyang Sunat Hajat Berjemaah iaitu khusus bagi para pelajar yang mengikuti kelas tuisyen di bawah Program Intervensi Pendidikan (PIP) Yayasan bagi sesi pengajian 2018 iaitu sebagai penutup bagi aktiviti kelas tuisyen PIP tahun 2018. Sembahyang Sunat Hajat Berjemaah diadakan secara serentak di

ke empat-empat daerah pada 18 Muharam 1440 bersamaan 28 September 2018.

Di Daerah Brunei dan Muara, Sembahyang Sunat Hajat Berjemaah diadakan di Masjid Yayasan Sultan Haji Hassanal Bolkiah, Kampong Bolkiah 'A'. Hadir selaku tetamu kehormat ialah Pengiran Dato Seri Paduka Haji Bahrom bin Pengiran Haji Bahar, ahli

Lembaga Pengarah Yayasan. Atur cara dimulakan dengan Sembahyang Sunat Hajat berjemaah, bacaan Surah Yasin beramai-ramai dan diikuti dengan bacaan Surah Al-Waqi'ah oleh para pelajar di bawah Projek Tahsin Al-Quran dan Amali Ugama. PIP. Yayasan juga menyampaikan sijil penyertaan kepada para pelajar yang mengikuti perkhemahan motivasi PIP





2018 dan sijil penghargaan kepada tiga buah sekolah yang digunakan sebagai Pusat Tuisyen PIP 2018 di Daerah Brunei Muara iaitu Sekolah Yayasan Sultan Haji Hassanal Bolkiah, Pusat Tingkatan Enam, Sengkurong dan Sekolah Rendah Pengiran Anak Puteri Besar Sungai Kebun.

Sembahyang Sunat Hajat Berjemaah di Daerah Belait diadakan di Masjid Kampong Pandan 7. Pengarah Urusan Yayasan, Dato Paduka Eddie bin Dato Paduka Haji Sunny hadir selaku tetamu kehormat. Atur cara dimulakan dengan

Sembahyang Sunat Hajat berjemaah. bacaan Surah Yasin beramai-ramai dan diikuti dengan bacaan Surah At-Takatsur hingga Surah An-Nas oleh para pelajar di bawah Projek Tahsin Al-Quran dan Amali. PIP. Yayasan juga menyampaikan sijil penyertaan kepada para pelajar yang mengikuti perkhemahan motivasi PIP 2018 dan sijil penghargaan kepada dua buah sekolah yang digunakan sebagai Pusat Tuisyen PIP 2018 di Daerah Belait iaitu Sekolah Menengah Pengiran Jaya Negara Pengiran Haji Abu Bakar dan Anthony Abell College.

Di Daerah Tutong pula. Sembahyang Sunat Hajat Berjemaah diadakan di Masjid Pengiran Anak Haji Mohammed Alam. Kampong Sengkarai. Hadir selaku tetamu kehormat ialah Dato Paduka Awang Haji Hamiddon bin Haji Ibrahim, ahli Lembaga Pengarah Yayasan. Atur cara dimulakan dengan Sembahyang Sunat Hajat berjemaah, bacaan Surah Yasin beramai-ramai dan diikuti dengan bacaan Surah Al-'Alaq oleh para pelajar di bawah Projek Tahsin Al-Quran dan Amali. PIP. Yayasan juga menyampaikan sijil penyertaan kepada para pelajar yang mengikuti perkhemahan motivasi PIP 2018 dan sijil penghargaan kepada tiga buah sekolah yang digunakan sebagai Pusat Tuisyen PIP 2018 di Daerah Tutong iaitu Sekolah Menengah Sufri Bolkiah, Sekolah Menengah Raja Isteri Pengiran Anak Saleha dan Sekolah Menengah Sayyidina 'Othman.

Manakala bagi Daerah Temburong. Sembahyang Sunat Hajat Berjemaah diadakan di Dewan Serba Guna, Kem Latihan Program Khidmat Bakti Negara, Kampong Batu Apoi. Hadir selaku tetamu kehormat ialah Awang Ahmad Jefri bin Abdul Rahman, ahli Lembaga Pengarah Yayasan. Atur cara dimulakan dengan Sembahyang Sunat Hajat berjemaah, bacaan Surah Yasin beramai-ramai dan diikuti dengan bacaan Surah Al-Kafirun hingga An-Nas oleh para pelajar di bawah Projek Tahsin Al-Quran dan Amali. PIP. Yayasan juga menyampaikan sijil penyertaan kepada para pelajar yang mengikuti perkhemahan motivasi PIP 2018 dan sijil penghargaan kepada dua buah sekolah yang digunakan sebagai Pusat Tuisyen PIP 2018 di Daerah Temburong iaitu Sekolah Menengah Sultan Hassan dan Sekolah Rendah Rataie.

Kelas tuisyen PIP menumpukan pembelajaran mata pelajaran teras bagi memastikan para pelajar mendapat keputusan cemerlang dalam peperiksaan supaya mereka mendapat peluang terbaik dalam meneruskan pengajian ke peringkat yang lebih tinggi. Selain itu, mata pelajaran Al-Quran dan amali ugama juga diserapkan dalam program PIP yang dipanggil dengan Projek Tahsin. ■





Jerayawara Skim Biasiswa Sultan's Scholar

Yayasan Sultan Haji Hassanal Bolkiah mengadakan Jerayawara Skim Biasiswa Sultan's Scholar bagi memberikan pendedahan mengenai Skim Biasiswa Sultan's Scholar dan perkara-perkara yang berkaitan. Jerayawara tersebut juga dihasratkan bagi memberikan dorongan serta menyuntik semangat kepada para pelajar untuk meraih kecemerlangan yang membolehkan mereka melanjutkan

pengajian mereka ke tahap yang lebih tinggi ke universiti ternama melalui biasiswa yang berprestij biasiswa Sultan's Scholar.

Jerayawara dibukakan kepada pelajar-pelajar Maktab Sekolah Menengah dan Pusat-Pusat Tingkatan Enam di seluruh negara yang akan menduduki peperiksaan peringkat 'A' level iaitu PRA U1 dan PRA U2 dan juga pelajar-pelajar yang

mengambil Program *Diploma International Baccalaureate (IB)*. Jerayawara tersebut diadakan selama tiga hari bertempat di Dewan Serba Guna Kompleks Yayasan Sultan Haji Hassanal Bolkiah, Bandar Seri Begawan.

Pada hari pertama iaitu 12 Zulkaedah 1439 bersamaan 25 Julai 2018, jerayawara tersebut dihadiri oleh pelajar-pelajar peringkat 'O' Level dan Sijil Pelajaran Ugama Brunei (SPUBL) manakala pada hari kedua iaitu pada 18 Zulhijjah 1439 bersamaan 30 Ogos 2018 pula dihadiri oleh pelajar-pelajar peringkat 'A' Level, Sijil Tinggi Pelajaran Ugama Brunei (STPUBL) dan Diploma Aliah Qiraat. Pada hari ketiga iaitu pada 23 Zulhijjah 1439 bersamaan 4 September 2018, jerayawara tersebut dihadiri oleh pelajar-pelajar peringkat 'A' Level dan 'O' Level daripada Jerudong International School, International School Brunei dan Pusat Tingkatan Enam Meragang.

Beberapa penerangan disampaikan semasa jerayawara tersebut seperti penerangan mengenai syarat-syarat kelayakan atau kriteria-kriteria bagi mengikuti Skim Biasiswa Sultan's Scholar, proses pemilihan pelajar yang berpotensi untuk mengikuti Skim Biasiswa Sultan's Scholar dan langkah-langkah untuk memperoleh kemasukan ke universiti ternama di luar negara. Sesi perkongsian 'sharing session' daripada sebahagian penerima-penerima Skim Biasiswa Sultan's Scholar yang sudah menamatkan pengajian dan yang sedang dalam pengajian juga diadakan.

Skim Biasiswa Sultan's Scholar Yayasan adalah merupakan salah satu inisiatif Yayasan dalam mengendalikan program pembangunan kapasiti tenaga manusia bagi melahirkan generasi yang berilmu pengetahuan yang seterusnya akan berperanan terhadap kemajuan dan pembangunan negara selaras dengan Wawasan Brunei 2035 - bagi melahirkan rakyat yang berjaya, berpendidikan dan berkemahiran tinggi ke arah kehidupan rakyat berkualiti tinggi. ■





Bengkel Rekabentuk Kesenian Islam

Pusat Pengajian Kesenian dan Kaligrafi Islam Yayasan Sultan Haji Hassanal Bolkiah (PPKKI-YSHHB) telah menganjurkan Bengkel Rekabentuk Kesenian Islam dan disertai oleh seramai sembilan orang peserta. Bengkel diadakan pada setiap hari Jumaat bermula pada 22 Syawal 1439 bersamaan 6 Julai 2018 hingga 5 Zulhijah 1439 bersamaan 17 Ogos 2018.

Bengkel diadakan bagi menarik minat di kalangan belia untuk mengenali dan

mempelajari rekabentuk kesenian Islam dan praktikal cara penghasilan Zukhruf berpandukan falsafah Seni Islam.

Salah satu fungsi PPKKI-YSHHB adalah sebagai sebuah institusi yang menawarkan program pengajian dalam bidang seni Islam dan kaligrafi dalam mengembangkan pelbagai pengetahuan, kecekapan dan kemahiran seni Islam terutamanya seni mushaf, kaligrafi dan seni hiasan Islam dengan menggunakan aplikasi dan perisian teknologi terkini.

Majlis Penyampaian Sijil Penyertaan Bengkel Rekabentuk Kesenian Islam telah diadakan pada 5 Zulhijah 1439 bersamaan 17 Ogos 2018 di Ibu Pejabat Yayasan Sultan Haji Hassanal Bolkiah, Jalan Perdana Menteri. Sijil-sijil penyertaan telah disampaikan oleh Dato Paduka Eddie bin Dato Paduka Haji Sunny, Pengarah Urusan Yayasan Sultan Haji Hassanal Bolkiah kepada semua peserta bengkel. ■



Lawatan daripada Universiti Airlangga Indonesia

Yayasan Sultan Haji Hassanal Bolkiah menerima lawatan daripada lima orang pelajar yang mengikuti program Sains Ekonomi Islam daripada Universiti Airlangga (UNAIR) Indonesia pada 6 Zulkaedah 1439 bersamaan 19 Julai 2018.

Lawatan merupakan salah satu program yang diaturkan oleh Universiti Islam Sultan Sharif Ali (UNISSA), yang menjadi tuan rumah bagi program penempatan pelajar tersebut. Seramai sepuluh orang pelajar daripada UNISSA juga turut serta dalam lawatan tersebut.

Para rombongan pelawat dialu-alukan oleh Pegawai Perhubungan Awam dan Pegawai Tugas-Tugas Khas. Bersesuaian dengan bidang pengajian mereka, perbincangan yang menarik perhatian para pelawat ialah mengenai Skim Pembiayaan Kebajikan Yayasan (SPK) iaitu program pemberian bantuan modal perniagaan dan perusahaan kepada keluarga yang kurang berkemampuan. Selain daripada pemberian bantuan modal, beberapa program juga diaturkan untuk disertai oleh para penerima bantuan SPK seperti program bimbingan dan kemahiran serta program pemantauan. ■





Pemeriksaan Kesihatan bagi Warga Kerja Yayasan

Prihatin terhadap kesejahteraan warga kerja, Yayasan Sultan Haji Hassanal Bolkiah mengadakan pemeriksaan kesihatan yang dibuka kepada semua pegawai dan kakitangan. Pemeriksaan kesihatan dikendalikan dengan kerjasama Pusat Promosi Kesihatan, Kementerian Kesihatan.

Pemeriksaan kesihatan diadakan pada 7 Zulhijah 1439 bersamaan 19 Ogos 2018 bertempat di Dewan Serba Guna Sekolah Yayasan Sultan Haji Hassanal Bolkiah.

Antara tujuan pemeriksaan kesihatan adalah untuk memberi kesedaran terhadap



amalan gaya hidup sihat, mengawal dan mengawasi risiko penyakit berbahaya seperti kencing manis, tekanan darah tinggi dan cara-cara mencegahnya serta untuk mengetahui trend kesihatan para pegawai dan kakitangan Yayasan bagi menyediakan program kesihatan yang bersesuaian.

Pegawai dan kakitangan yang didapati mempunyai keputusan pemeriksaan tidak normal akan dirujuk kepada pakar pemakanan dan ke klinik-klinik kesihatan yang berkenaan untuk pemeriksaan lanjut dan lebih terperinci. ■



Yayasan Beri Sokongan kepada Konvensyen Kepimpinan Belia

Yayasan Sultan Haji Hassanal Bolkiah bersama Kementerian Kebudayaan, Belia dan Sukan menjadi penyokong utama bagi penganjuran konvensyen kepimpinan belia iaitu Konvensyen Pemimpin Muda Brunei "Brunei Young Leader's Convention - BYLC" yang dianjurkan oleh Al-Huffaz Management dan Generasi Bekaroh dan dipimpin oleh Yang Berhormat Iswandy bin Ahmad, Ahli Majlis Mesyuarat Negara.

Brunei Young Leader's Convention (BYLC) dengan tema *Believe. Empower. Lead. Inspire. Act* (BELIA) telah dilancarkan oleh Yang Berhormat Dato Seri Setia Awang Haji Abdul Mokti bin Haji Mohd Daud, Menteri di Jabatan Perdana Menteri pada 25 Zulkaedah 1439 bersamaan 7 Ogos 2018. Konvensyen berlangsung selama tiga hari bertempat di Goldstone Ballroom, The Centrepoint Hotel, Gadong. Konvensyen telah ditutup secara rasmi oleh Yang Berhormat Mejar Jeneral (B)

Dato Paduka Seri Awang Haji Aminuddin Ihsan bin Pehin Orang Kaya Saiful Mulok Dato Seri Paduka Haji Abidin, Menteri Kebudayaan, Belia dan Sukan.

Belia adalah aset yang sangat bernilai dan berharga kepada negara dan menjadi tonggak kekuatan generasi serta pewaris kepimpinan masa depan negara. Yayasan telah menggariskan usaha mempertingkatkan penglibatan dan penyertaan belia dalam pembangunan masyarakat pada salah satu tujuan utama penubuhannya. Melalui pendekatan *whole of nation*, Yayasan sangat mengalaukan para belia, persatuan belia dan pihak swasta untuk bersama-sama. Yayasan mengendalikan program-program pembangunan belia sama ada melalui bidang pendidikan, keusahawanan, kebudayaan dan sebagainya.

BYLC merupakan platform yang memberikan para belia asas melalui kaedah mentor dengan memberikan mereka idea, nasihat dan sebagainya. Para belia berpeluang untuk menghadiri forum, berinteraksi, membina rangkaian serta bekerjasama dengan mentor yang dilantik yang terdiri daripada belia-belia berpengalaman yang menyumbang pada pembangunan negara dan Wawasan Brunei 2035. Konvensyen tersebut dihasratkan bagi memberikan peluang kepada para belia untuk meraih ilmu pengetahuan dan menanam semangat untuk terus menyumbang ke arah pembangunan dan kemajuan negara.

Dato Paduka Eddie bin Dato Paduka Haji Sunny, Pengarah Urusan Yayasan Sultan Haji Hassanal Bolkiah telah dilantik sebagai salah seorang mentor dalam konvensyen tersebut dan menjadi salah seorang ahli panel dalam Forum Pembiayaan Projek (*Project Funding*).

Yayasan juga menaja sebanyak 150 tempat duduk kepada para belia yang memerlukan untuk sama-sama mengikuti konvensyen tersebut. ■





Bengkel Keusahawanan Tingkatkan Pengetahuan Peserta Skim Pembiayaan Kebajikan

Yayasan Sultan Haji Hassanal Bolkiah dengan kerjasama LiveWIRE Brunei mengadakan dua bengkel keusahawanan kepada pemohon-pemohon yang ingin mendapatkan bantuan modal perusahaan dan perniagaan daripada Yayasan melalui Skim Pembiayaan Kebajikan.

Bengkel keusahawanan pertama bertajuk "Bright Ideas" disertai oleh seramai 29 orang peserta. Bengkel diadakan selama dua hari iaitu pada 8 dan 9 Zulhijjah 1439 bersamaan 20 dan 21 Ogos 2018 bertempat di Bilik Serba Guna, Pusat Kaligrafi dan Kesenian Islam Yayasan Sultan Haji Hassanal Bolkiah, Rumah Semaun, Gadong, Bandar Seri Begawan.

Bengkel Keusahawanan "Bright Ideas" bertujuan bagi membuka minda para peserta terhadap peluang-peluang yang ada di sekeliling mereka yang boleh digunakan dalam menjana pendapatan; memberi pengetahuan asas kepada para peserta terhadap ilmu yang berkaitan dengan keusahawanan supaya mereka dapat menjalankan atau menguruskan perusahaan dan perniagaan mereka dengan lebih efektif, produktif, kreatif dan inovatif setelah menerima bantuan keusahawanan daripada Yayasan; berkongsi pengalaman atau maklumat berkaitan dengan perusahaan dan perniagaan yang akan dan sedang mereka usahakan serta mengubah mentaliti para peserta untuk menjadi

pengusaha yang mandiri, berkemahiran, berdaya usaha, berdaya tahan, berdaya saing, prihatin, bertanggungjawab dan saling bantu-membantu.

Sebagai kesinambungan kepada bengkel tersebut, satu lagi bengkel keusahawanan iaitu "Business Plan Series" telah diadakan selama dua hari iaitu pada 2 dan 3 Muharam 1440 bersamaan 12 dan 13 September 2018 bertempat di Dewan Serba Guna, Kompleks Yayasan Sultan Haji Hassanal Bolkiah, Bandar Seri Begawan.

Bengkel Keusahawanan Business Plan Series adalah merupakan fasa terakhir bagi para peserta sebelum mereka diserapkan ke dalam Skim Pembiayaan Kebajikan (SPK) Yayasan Sultan Haji Hassanal Bolkiah untuk diberikan bantuan modal perniagaan bagi membolehkan mereka menjalankan dan memajukan usaha perniagaan sebagaimana yang mereka hasratkan.

Majlis penyampaian sijil-sijil penyertaan kepada para peserta bengkel telah disempurnakan oleh Awang Haji Musthapa bin Haji Matahir, Penolong Pengarah Urusan Yayasan Sultan Haji Hassanal Bolkiah. Turut hadir adalah Pengarah Program LiveWIRE Brunei, Penolong-Penolong Pengarah Urusan Yayasan serta pegawai-pegawai daripada Yayasan dan LiveWIRE Brunei.

Bengkel keusahawanan tersebut bertujuan untuk memastikan para penerima bantuan modal keusahawanan di bawah SPK benar-benar mempunyai kemampuan dan kemahiran dalam bidang perniagaan yang mereka usahakan.

Yayasan seterusnya berharap jalinan kerjasama dengan LiveWIRE Brunei akan terus dikekalkan dan dipertingkatkan dalam merealisasikan hasrat kedua-dua pihak untuk melahirkan usahawan yang mahu "bakarib dan sanggup bajarib untuk balurib" dengan satu tujuan iaitu mengeluarkan mereka daripada belenggu kemiskinan. ■



Sumbangan kepada Tabung Kemanusiaan Bencana Sulawesi

Kejadian gempa bumi berukuran 7.7 skala Richter di Pulau Sulawesi pada 18 Muhamarram 1440 bersamaan 28 September 2018 telah menyebabkan tsunami di wilayah Kota Palu dan Donggala, Sulawesi Tengah, Indonesia. Prihatin terhadap kesejahteraan mangsa yang terlibat, Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam telah memperkenankan bagi penubuhan Tabung Kemanusiaan Bencana Sulawesi selama tempoh tiga bulan bermula pada 29 Muhamarram 1440 bersamaan 9 Oktober 2018. Ianya juga bagi membolehkan seluruh rakyat dan penduduk negara ini

untuk menyumbang derma khusus untuk meringankan beban penderitaan mangsa-mangsa gempa bumi dan tsunami Sulawesi.

Sebagai keprihatinan terhadap mangsa dan bagi menyokong penubuhan Tabung Kemanusiaan Bencana Sulawesi, Yayasan Sultan Haji Hassanal Bolkiah memberikan sumbangan kewangan sebanyak BND50,000.00 kepada tabung berkenaan.

Sumbangan tersebut telah disampaikan oleh Yang Berhormat Dato Seri Setia Haji Awang Abdul Mokti bin Haji Mohd Daud, ahli Lembaga Pengarah Yayasan yang

jugak selaku Pengurus Jawatankuasa Meneliti Bantuan Yayasan kepada Yang Berhormat Mejar Jeneral (B) Dato Paduka Seri Haji Aminuddin Ihsan bin Pehin Orang Kaya Saiful Mulok Dato Seri Paduka Haji Abidin, Menteri Kebudayaan, Belia dan Sukan selaku Penasihat Bersama Tabung Kemanusiaan Bencana Sulawesi. Majlis Penyampaian Sumbangan Yayasan telah diadakan pada 8 Safar 1440 bersamaan 17 Oktober 2018 bertempat di Kementerian Kebudayaan, Belia dan Sukan, Jalan Kebangsaan. Berakas. ■

Aktiviti Takmir Masjid sempena Sambutan Maulidur Rasul



Salah satu usaha Yayasan Sultan Haji Hassanal Bolkiah bagi mengembangkan syiar Islam di negara ini adalah dengan memberikan sokongan dalam program memakmurkan masjid.

Yayasan memberikan bantuan berupa kewangan kepada 47 buah masjid, surau dan balai ibadat di seluruh negara bertujuan bagi menganjurkan aktiviti takmir masjid sempena Maulidur Rasul Sallallahu 'Alaihi Wasallam bagi tahun 1440/2018.

Sumbangan tersebut telah disampaikan oleh Dato Paduka Eddie bin Dato Paduka Haji Sunny, Pengarah Urusan Yayasan Sultan Haji Hassanal Bolkiah kepada imam-imam masjid, surau dan balai ibadat berkenaan. Majlis penyampaian telah diadakan pada 21 Safar 1440 bersamaan 30 Oktober 2018 bertempat di Dewan Serba Guna, Kompleks Yayasan Sultan Haji Hassanal Bolkiah, Bandar Seri Begawan. ■

Sokongan Yayasan kepada Persatuan Demensia Brunei



Demensia Brunei adalah sebuah organisasi bukan Kerajaan yang menitikberatkan hak individu yang mempunyai penyakit demensia dan majoritinya terdiri daripada kalangan warga emas. Demensia Brunei ditubuhkan secara rasmi pada 4 Disember 2017 dengan objektif untuk meningkatkan kesedaran orang ramai tentang penyakit demensia. Demensia Brunei menyediakan maklumat tentang demensia di samping meningkatkan standard penjagaan bagi pesakit demensia.

Dalam memberikan sokongan kepada usaha dan aktiviti Demensia Brunei,

Yayasan Sultan Haji Hassanal Bolkiah telah memberikan tajaan berupa beg/string bags/ sebanyak 500 helai sebagai cenderamata bagi acara larian amal 'Memory Walk and Fun Run' bersempena 'World's Alzheimer's Month' anjuran Demensia Brunei. Acara larian amal ini bukan sahaja bagi mendapatkan kutipan tetapi juga sebagai promosi bagi memberikan kesedaran orang ramai terhadap penyakit demensia.

Penyampaian tajaan tersebut telah diadakan pada 10 Muharam 1440 bersamaan 20 September 2018 di Ibu Pejabat Yayasan Sultan Haji Hassanal Bolkiah, Jalan Perdana

Menteri. Sumbangan Yayasan disampaikan oleh Awang Haji Musthapa bin Haji Matahir, Penolong Pengarah Urusan Yayasan Sultan Haji Hassanal Bolkiah kepada Dayang Nurul Bazilah binti Haji Ali, Setiausaha Demensia Brunei.

Sebagai sokongan dalam penganjuran acara larian amal ini, seramai 117 orang pegawai dan kakitangan Yayasan serta guru-guru Sekolah Yayasan telah menyertai larian amal tersebut yang diadakan pada 13 Muharam 1440 bersamaan 23 September 2018 di Pusat Promosi Kesihatan, Kementerian Kesihatan. Berakas. ■

Penghargaan kepada Sukarelawan Yayasan Sultan Haji Hassanal Bolkiah



Yayasan Sultan Haji Hassanal Bolkiah mengadakan Majlis Penghargaan dan Sambutan Hari Raya Aidilfitri bersama Ahli-Ahli Jawatankuasa dan Para Sukarelawan Yayasan pada 29 Syawal 1439 bersamaan 13 Julai 2018 bertempat di Dewan Serba Guna, Sekolah Yayasan Sultan Haji Hassanal Bolkiah, Jalan Kebangsaan.

Hadir sebagai tetamu kehormat ialah Yang Berhormat Datin Seri Paduka Hajah Hayati binti Pehin Orang Kaya Shahbandar Dato

Seri Paduka Haji Mohd Salleh, ahli Lembaga Pengarah Yayasan Sultan Haji Hassanal Bolkiah.

Seramai 10 orang mantan atau bekas ahli-ahli Jawatankuasa Sukarelawan Yayasan yang juga terdiri daripada mantan atau bekas ahli-ahli Lembaga Pengarah Yayasan menerima sijil penghargaan di majlis tersebut. Di samping itu, seramai 384 orang ahli sukarelawan yang telah menyumbang khidmat bakti dalam menjayakan projek-

projek dan aktiviti-aktiviti Yayasan sepanjang tahun 2017-2018 sama ada dari segi kepakaran, tenaga dan sebagainya juga menerima sijil penghargaan di majlis tersebut.

Majlis diakhiri dengan sesi ramah mesra dalam suasana meriah sempena Hari Raya Aidilfitri. ■



Perkhemahan Motivasi Pelajar PIP

Perkhemahan motivasi merupakan salah satu projek yang dikendalikan di bawah Program Intervensi Pendidikan (PIP) anjuran Yayasan Sultan Haji Hassanal Bolkiah. Perkhemahan ini diadakan sekali pada setiap tahun dan disertai oleh para pelajar yang mengikuti projek kelas tuisyen PIP.

Pada tahun 2018, seramai 148 orang pelajar peringkat menengah daripada semua pusat kelas tuisyen PIP di seluruh negara telah dipilih bagi mengikuti perkhemahan motivasi PIP. Perkhemahan diadakan di Kem Latihan Program Khidmat Bakti Negara, Daerah Temburong selama tiga hari bermula

pada 26 Zulhijjah bersamaan 7 September 2018. Perkhemahan dikendalikan oleh para sukarelawan Yayasan dengan kerjasama daripada Kementerian Pendidikan, Kem Latihan Program Khidmat Bakti Negara (PKBN) dan Brunei Darussalam Aids Council.

Berbagai-bagai aktiviti telah diatur sepanjang perkhemahan yang bertujuan bagi menanam semangat yang positif kepada para peserta supaya menjadi seorang yang berdisiplin, berkeyakinan, bertanggungjawab dan berwibawa dalam menempuh cabaran dalam kehidupan. ■



Ibadah Korban dan Sambutan Hari Raya Aidiladha

Yayasan Sultan Haji Hassanal Bolkiah mengadakan Majlis Sambutan Hari Raya Aidiladha pada 12 Zulhijjah 1439 bersamaan 24 Ogos 2018 bertempat di Rumah Semaun, Pusat Pengajian Kesenian dan Kaligrafi Islam. Yayasan Sultan Haji Hassanal Bolkiah, Jalan Perdana Menteri, Bandar Seri Begawan. Sempena sambutan Hari Raya Aidiladha 1439 Hijrah seramai 63 orang pekerja Yayasan dan ahli keluarga menyertai ibadah korban. Sebanyak lapan ekor kerbau dan seekor sapi disembelih sebagai korban.

Penyampaian daging-daging korban telah disempurnakan oleh Yang Berhormat Dato Seri Setia Haji Awang Abdul Mokti bin Haji Mohd Daud, ahli Lembaga Pengarah Yayasan Sultan Haji Hassanal Bolkiah

selaku tetamu kehormat majlis. Daging-daging korban disampaikan kepada para peserta yang menyertai ibadah korban, para jemputan dan golongan fakir miskin. Penyampaian daging-daging korban kepada golongan fakir miskin disampaikan melalui ketua-ketua kampung dan wakil-wakil yang telah dikenal pasti iaitu Ketua Kampong Bolkiah 'A', Ketua Kampong Bolkiah 'B', Ketua Kampong Lumapas 'B', Imam Masjid Kampong Benutan, Imam Masjid Kampong Bukit dan Imam Pusat Kegiatan Ugama Kampong Bebuloh.

Majlis Sambutan Hari Raya Aidiladha dan Ibadah Korban adalah merupakan salah satu aktiviti tahunan yang dikendalikan oleh Badan Kebajikan Pekerja Yayasan Sultan Haji Hassanal Bolkiah (BKPYSHB). ■



Sambutan Awal Tahun 1440 Hijrah



Awal Muharam atau Maal Hijrah adalah merupakan antara hari kebesaran yang disambut oleh umat Islam. Maal Hijrah disambut bagi mengingati peristiwa penting yang berlaku dalam sejarah Islam iaitu penghijrahan Nabi Muhammad Sallallahu 'Alaihi Wasallam dari Kota Makkah ke Madinah pada tahun 622 Masihi.

Sempena sambutan awal tahun baharu 1440 Hijrah, Yayasan Sultan Haji Hassanal

Bolkiah melalui Badan Kebajikan Pekerja Yayasan telah mengadakan ceramah ugama pada 9 Muharam 1440 bersamaan 19 September 2018 bertempat di Dewan Serba Guna Kompleks Yayasan Sultan Haji Hassanal Bolkiah, Bandar Seri Begawan.

Hadir selaku tetamu kehormat di majlis tersebut ialah Dato Paduka Eddie bin Dato Paduka Haji Sunny, Pengarah Urusan Yayasan Sultan Haji Hassanal Bolkiah.

Seramai 200 orang ahli Badan Kebajikan Pekerja Yayasan hadir pada majlis tersebut.

Ceramah bertajuk 'Hijrah, Inspirasi dan Realisasi. Dalam Pendidikan Peribadi Menuju Redha Ilahi' disampaikan oleh Ustaz Haji Mail bin Besar.

Dalam Islam, hijrah adalah satu amalan yang amat digalakkan. Hijrah yang dimaksudkan ialah seperti yang dilakukan oleh Nabi Muhammad Sallallahu 'Alaihi Wasallam, berpindah daripada persekitaran yang buruk, kepada persekitaran yang lebih baik demi kepentingan agama. Hijrah menuntut kepada pengorbanan, kerana ia akan turut membawa perubahan dan pembaharuan dalam kehidupan seseorang. ■





Anugerah Insentif Pelajar Cemerlang bagi Anak Yatim

Anugerah Insentif Pelajar Cemerlang Dana Pengiran Muda Mahkota Al-Muhtadee Billah Untuk Anak-Anak Yatim (AIPC-DANA) disediakan oleh Dana Pengiran Muda Mahkota Al-Muhtadee Billah Untuk Anak-Anak Yatim (DANA) bertujuan untuk menyuntik semangat dan dorongan kepada anak-anak yatim supaya menghargai kepentingan pendidikan dan menggalakkan mereka untuk terus mempertingkatkannya bagi keperluan masa hadapan. AIPC-DANA juga dihasratkan untuk menimbulkan kesedaran di kalangan anak-anak yatim terhadap perhatian masyarakat kepada mereka supaya mereka terus berusaha meraih kejayaan dan berjaya dalam hidup di sebalik kehilangan tempat bergantung. Pelaksanaan AIPC-DANA adalah selaras dengan tujuan penubuhan DANA iaitu bagi membantu anak-anak yatim untuk mendapatkan asuhan, pimpinan dan pendidikan bagi menjadikan mereka warganegara yang berguna.

Seramai 13 orang anak yatim telah terpilih untuk menerima AIPC-DANA bagi tahun 2018. Mereka terdiri daripada anak-anak yatim yang mendapat keputusan cemerlang dalam peperiksaan awam tahun 2017.

Pelajar-pelajar yang menerima AIPC-DANA 2018 dan insentif yang mereka terima adalah seperti berikut:

1) Bagi Peperiksaan Brunei Cambridge GCE 'O' Level, penerima ialah Awang Ryan Lim Ming Shun, Dayang Sonia binti Abdullah Jamaris, Dayang Chung Yu Shan, Dayang Chung Yu Yan dan Ampuan A'qillah Farahiyah binti Ampuan Haji Mohamad. Setiap seorang menerima satu sijil penghargaan, satu unit komputer berserta mesin pencetak dan pakej kemudahan belajar selama dua tahun dalam bentuk wang tunai bernilai BND760.00.

2) Bagi Peperiksaan Penilaian Sekolah Rendah (PSR), penerima ialah Dayang Noradrianna binti Mat Sapar, Awang Mohammad Daniel bin Husny, Awang Mohammad Nuraizuddin Hibatullah bin Abdullah, Dayang Kelly Chia Kay Li dan Dayang Siti Khadijah binti Marali. Setiap seorang menerima satu sijil penghargaan, satu unit komputer berserta mesin pencetak dan pakej kemudahan belajar selama dua tahun dalam bentuk wang tunai bernilai BND400.00.

3) Bagi Peperiksaan Sijil Sekolah-Sekolah Rendah Ugama Darjah 6 (SSSRU), penerimanya ialah Dayang Raimma Rahima Liyanna binti Beraim, Dayangku Afiqah Najwa binti Pengiran Ibni dan Dayang Nurul Fitri Sofia binti Haji Rosli. Setiap seorang menerima satu sijil penghargaan, satu unit komputer berserta mesin pencetak dan wang simpanan sebanyak BND500.00 yang dikreditkan terus ke Akaun DANA masing-masing di Perbadanan Tabung Amanah Islam Brunei.

Majlis Penyampaian AIPC-DANA 2018 telah diadakan pada 8 Zulhijah 1439 bersamaan 20 Ogos 2018 bertempat di Dewan Serba Guna, Kompleks Yayasan Sultan Haji Hassanal Bolkiah, Bandar Seri Begawan. Hadir selaku tetamu kehormat dan menyampaikan AIPC-DANA 2018 ialah oleh Yang Berhormat Pehin Datu Lailaraja Mejar Jeneral (B) Dato Paduka Seri Haji Awang Halbi bin Haji Mohd. Yussof, Timbalan Pengurus Lembaga Pemegang Amanah DANA. Turut hadir ialah Dato Paduka Eddie bin Dato Paduka Haji Sunny, Ketua Pegawai Eksekutif DANA. ■

DANA Hargai Sokongan dan Sumbangan Ikhlas Para Dermawan

Usaha Dana Pengiran Muda Mahkota Al-Muhtadee Billah Untuk Anak-Anak Yatim (DANA) dalam melaksanakan pelbagai program bagi membantu mempertingkatkan kesejahteraan hidup anak-anak yatim di Negara Brunei Darussalam terus mendapat sokongan daripada para dermawan. DANA sangat menghargai usaha yang berterusan daripada semua pihak dalam menganjurkan program dan aktiviti dalam mendapatkan kutipan untuk disumbangkan kepada anak-anak yatim yang berdaftar di Sekretariat DANA.

Penerimaan Hasil Kutipan 'SMS' Brunei Prihatin bagi DANA 2017-2018

Untuk meningkatkan rasa pemeliharaan dan kasih sayang di kalangan masyarakat terhadap anak-anak yatim, DANA telah melancarkan 'SMS' Brunei Prihatin Bagi DANA Tahun 2017-2018 pada 9 Rabiulawal 1439 bersamaan 28 November 2017. Projek ini adalah merupakan salah satu usaha DANA dalam mempelbagaikan cara atau mekanisme yang mudah untuk orang ramai menyalurkan sumbangan ikhlas mereka khusus kepada anak-anak yatim di negara ini. Projek 'SMS' tersebut berjalan selama 65 hari bermula dari 9 Rabiulawal 1439 bersamaan 28 November 2017 hingga

14 Jamadilawal 1439 bersamaan 31 Januari 2018. Projek 'SMS' ini disokong oleh dua buah syarikat telekomunikasi di negara ini iaitu DST dan Progresif Cellular Sdn Bhd.

Pada 8 Zulhijjah 1439 bersamaan 20 Ogos 2018, DANA mengadakan Majlis Penerimaan Sumbangan Hasil Kutipan 'SMS' Brunei Prihatin Bagi DANA Tahun 2017-2018 bertempat di Dewan Serba Guna, Kompleks Yayasan Sultan Haji Hassanal Bolkiah, Bandar Seri Begawan. 'SMS' Brunei Prihatin Bagi DANA Tahun 2017-2018 telah berjaya membuat kutipan dari orang ramai sebanyak BND84,143.00. Sebahagian daripada jumlah tersebut iaitu sebanyak BND74,019.00 berjaya dikutip

melalui pelanggan DST dan disampaikan oleh Awang Haji Suhaimi bin Haji Awang Hussain, Ketua Pegawai Eksekutif DST. Manakala sebahagiannya pula iaitu sebanyak BND10,124.00 berjaya dikutip melalui pelanggan Progresif Cellular Sdn Bhd dan disampaikan oleh Dayang Nurul Haniah binti Jaafar, Ketua Pegawai Pentadbir Progresif Cellular Sdn Bhd.

Kesemua sumbangan tersebut diterima oleh Yang Berhormat Pehin Datu Lailaraja Mejai Jeneral (B) Dato Paduka Seri Haji Awang Halbi bin Haji Mohd Yussof, Timbalan Penggerusi Lembaga Pemegang Amanah Dana Pengiran Muda Mahkota Al-Muhtadee Billah Untuk Anak-Anak Yatim.

Sumbangan daripada DST dan Progresif Cellular Sdn Bhd

Dua buah syarikat telekomunikasi di negara ini iaitu DST dan Progresif Cellular Sdn Bhd memberikan sumbangan kepada DANA di Majlis Penerimaan Sumbangan Hasil Kutipan 'SMS' Brunei Prihatin Bagi DANA Tahun 2017-2018 pada 8 Zulhijjah 1439 bersamaan 20 Ogos 2018 bertempat di Dewan Serba Guna, Kompleks Yayasan Sultan Haji Hassanal Bolkiah, Bandar Seri Begawan.

DST menyampaikan sumbangan tahunan syarikat berkenaan sebanyak BND20,000.00 yang disampaikan oleh Awang Haji Suhaimi bin Haji Awang Hussain, Ketua Pegawai Eksekutif DST. Progresif Cellular Sdn Bhd pula menyampaikan sumbangan sebanyak BND2,440.16 iaitu hasil kutipan Tabung Tabung DANA Progresif Cellular yang ditempatkan di sebahagian cawangan Progresif Cellular. Sumbangan tersebut



disampaikan oleh Dayang Nurul Haniah binti Jaafar, Ketua Pegawai Pentadbir Progresif Cellular Sdn Bhd.

Kesemua sumbangan tersebut diterima oleh Yang Berhormat Pehin Datu Lailaraja Mejai

Jeneral (B) Dato Paduka Seri Haji Awang Halbi bin Haji Mohd Yussof, Timbalan Penggerusi Lembaga Pemegang Amanah Dana Pengiran Muda Mahkota Al-Muhtadee Billah Untuk Anak-Anak Yatim.

Sumbangan daripada Kejohanan Golf '9th Audi Quattro Cup Brunei Charity Golf Tournament 2018'

DANA menerima sumbangan sebanyak BND2,160.00 iaitu sebahagian hasil dari kutipan Kejohanan Golf '9th Audi Quattro Cup Brunei Charity Golf Tournament 2018' anjuran Syarikat TCY Motors Sdn Bhd. Sumbangan tersebut disampaikan semasa Majlis Penyampaian Hadiah Kejohanan

Golf '9th Audi Quattro Cup Brunei Charity Golf Tournament 2018' pada 9 Zulkaedah 1439 bersamaan 22 Julai 2018 bertempat di Jerudong Park Golf & Country Club. Sumbangan tersebut disampaikan oleh Pengarah TCY Motors Sdn Bhd, Awang Teng Chee How kepada Awang Samsudin bin Haji Puasa, Pegawai Yayasan Sultan Haji Hassanal Bolkiah bagi pihak Ketua Pegawai Eksekutif DANA.



Sumbangan daripada Badan Kebajikan Pekerja Yayasan Sultan Haji Hassanal Bolkiah

Semasa Majlis Ibadah Korban dan Sambutan Hari Raya Aidiladha 1439H Anjuran Badan Kebajikan Pekerja Yayasan Sultan Haji Hassanal Bolkiah (BKPYSHHB) pada 12 Zulhijjah 1439 bersamaan 24 Ogos 2018 telah diadakan penyampaian sumbangan kepada DANA.

BKPYSHHB menyampaikan sumbangan sebanyak BND500.00. Sumbangan tersebut disampaikan oleh Awang Samsudin bin Haji Puasa, Yang Dipertua BKPYSHHB kepada

Dato Paduka Eddie bin Dato Paduka Haji Sunny selaku Ketua Pegawai Eksekutif DANA.

Di majlis yang sama, Tabung Derma Khairat Pekerja (TADEKHA) BKPYSHHB menyampaikan sumbangan sebanyak BND500.00. Sumbangan tersebut disampaikan oleh Awang Ahmad Rithauddin bin Haji Sabtu, Ketua Jawatankuasa Pengurusan TADEKHA BKPYSHHB kepada Dato Paduka Eddie bin Dato Paduka Haji Sunny selaku Ketua Pegawai Eksekutif DANA.



Sumbangan Daripada Sekolah St. John's

Sekolah St. John's menyampaikan sebanyak BND1,524.86 iaitu lima peratus (5%) daripada hasil kutipan acara Jogathon anjuran Sekolah St. John's yang diadakan pada 26 Syaaban 1439 bersamaan 12 Mei 2018. Sumbangan tersebut disampaikan

oleh Pengetua Sekolah St. John kepada Awang Samsudin bin Haji Puasa, Pegawai Yayasan Sultan Haji Hassanal Bolkiah selaku wakil Ketua Pegawai Eksekutif DANA pada 18 Syawal 1439 bersamaan 2 Julai 2018 bertempat di Ibu Pejabat Yayasan Sultan Haji Hassanal Bolkiah, Jalan Perdana Menteri, Bandar Seri Begawan.



Sekolah Ugama Pengiran Muda Abdul Azim Serasa

Sekolah Ugama Pengiran Muda Abdul Azim Serasa menyumbangkan sebanyak BND568.51. Sumbangan tersebut adalah sebahagian dari hasil kutipan Walkathon "SUPMAA Serasa Siuk" yang telah diadakan pada 30 September 2018. Sumbangan tersebut disampaikan oleh

Dayang Norliyana binti Haji Ahmad, Guru Besar Sekolah Ugama Pg Muda Abd Azim Serasa dan diterima oleh Dato Paduka Eddie bin Dato Paduka Haji Sunny, Pegawai Eksekutif DANA pada 13 Safar 1440 Hijrah bersamaan 22 Oktober 2018 bertempat di Ibu Pejabat Yayasan Sultan Haji Hassanal Bolkiah, Jalan Perdana Menteri, Bandar Seri Begawan.



Jawatankuasa Penyelenggara Imbas Kembali Filem Gema Dari Menara

Jawatankuasa Penyelenggara Imbas Kembali Filem Gema Dari Menara telah menyerahkan sumbangan kepada DANA sebanyak BND4,056.20 iaitu hasil kutipan jualan tiket

dan derma daripada orang ramai semasa ulang tayang Filem Gema Dari Menara yang telah berlangsung pada 23 Oktober hingga 29 Oktober 2018. Sumbangan tersebut disampaikan oleh Pengiran Haji Abbas bin Pengiran Haji Besar, Pengerusi Bersama Jawatankuasa Penyelenggara Imbas Kembali

Filem Gema Dari Menara dan diterima oleh Dato Paduka Eddie bin Dato Paduka Haji Sunny, Ketua Pegawai Eksekutif DANA pada 22 Safar 1440 bersamaan 1 November 2018 di Ibu Pejabat Yayasan Yayasan Sultan Haji Hassanal Bolkiah, Jalan Perdana Menteri, Bandar Seri Begawan. ■



Rombongan SMA Kabupaten Bireuen Provinsi Aceh

Seramai 47 orang tenaga pengajar Sekolah Menengah Atas (SMA) Kabupaten Bireuen Provinsi Aceh yang diketuai oleh Jamaluddin Muhammad Abed mengadakan lawatan ke Sekolah Menengah Yayasan Sultan Haji Hassanal Bolkiah pada 19 Syawal 1439 bersamaan 3 Julai 2018.

Ketibaan rombongan dialu-alukan oleh Pemangku Pengetua Sekolah Menengah Yayasan, Cikgu Hidayatullah Waqiyuddin bin Haji Mohiddin, beliau juga telah menyampaikan taklimat ringkas mengenai Sekolah Menengah Yayasan Sultan Haji Hassanal Bolkiah.

Rombongan kemudian melawat ke perpustakaan sekolah, kelas-kelas dan bilik makmal sains bagi menyaksikan aktiviti pengajaran dan pembelajaran serta kemudahan-kemudahan yang disediakan di sekolah tersebut. ■





Program Pertukaran Pelajar



Seramai sepuluh orang pelajar dan dua orang guru Sekolah Menengah YAYASAN Sultan Haji Hassanal Bolkiah telah menyertai Program Pertukaran Pelajar bersama Sekolah Tinggi River Valley, Singapura. Mereka berlepas ke Singapura pada 1 hingga 6 Zulkaedah 1439 bersamaan 14 hingga 19 Julai 2018.

Rombongan pelajar dan guru dari Sekolah Tinggi River Valley, Singapura telah membuat lawatan ke Sekolah Menengah YAYASAN pada tahun 2017.

Program Pertukaran Pelajar ini adalah bagi memberi peluang kepada pelajar untuk meluaskan pengetahuan dengan pengalaman mereka di Singapura. Mereka diberi pendedahan mengenai persamaan dan perbezaan program pendidikan yang ditawarkan antara Brunei dan Singapura, serta persamaan dan perbezaan antara Brunei dan Singapura dari aspek masyarakat, ekonomi dan budaya. Program ini diharap akan dapat memberi peluang rangkaian kepada guru dan pelajar untuk bekerjasama dan berkongsi serta bertukar-tukar idea pada masa akan datang. ■

Kegiatan Sekolah



Minggu Aktiviti Sains

Minggu Aktiviti Sains adalah acara tahunan Sekolah Menengah Yayasan dengan meraikan mata pelajaran Sains. Minggu Aktiviti Sains 2018 telah dijalankan dari 4 hingga 6 Zulkaedah 1439 bersamaan 17 hingga 19 Julai 2018 dengan tema 'Be Hands

On'. Pelbagai aktiviti diadakan sepanjang minggu tersebut, seperti kempen Adopt A Tree, Pertandingan Menghias Akuarium dan Pameran Gaya Hidup Sihat oleh Pusat Promosi Kesihatan.

PMBF Animal Pet Wonder juga dijemput yang memperkenalkan koleksi haiwan seperti ular, biawak, katak, mamalia seperti anjing prairie, kura-kura dan burung yang ditempatkan di makmal Sains Sekolah Menengah Yayasan selama tiga hari Minggu Aktiviti Sains berjalan.

Pada 17 Julai 2018, semua lapisan masyarakat dari pelajar tadika, pelajar sekolah rendah, pelajar sekolah menengah, termasuk guru-guru sekolah dan ibu bapa memberikan sokongan dalam kempen Adopt A Tree. Tanaman bunga berwarna-warni seperti Lavender, Pukul Sembilan, Ruellia dan Misai Kuching serta buah-buahan seperti Cili Padi, Longan Ping Pong, Limau Sangkis Thai, Renyah-Renah Jawa, Daun Kari, Mangga, Durian Sarawak, Durian Montong dan Rambutan semuanya berjaya ditanam di sekitar kawasan sekolah.

Semasa Minggu Aktiviti Sains, kelas Sains menengah bawah dan atas mengambil bahagian dalam Pertandingan Menghias Akuarium yang bermula dari 9 Julai 2018 hingga 31 Julai 2018. Akuarium-akuarium dihiasi indah dengan ikan, batu kelikir, tumbuhan akuatik buatan manusia dan hiasan lainnya.

Pada 19 Julai 2018, Pusat Promosi Kesihatan, Kementerian Kesihatan mengadakan pameran Gaya Hidup Sihat di Concourse Area. Pameran meliputi Komponen nutrisi, aktiviti fizikal dan kesedaran tentang bahaya tembakau. Setiap peringkat kelas bergilir untuk melawat pameran pada waktu yang ditentukan selama 30 minit.

Objektif Minggu Sains adalah untuk menghargai sains dan alam semula jadi melalui penjelajahan dan penemuan, untuk meneroka keajaiban sains dan mendapatkan pengalaman yang menyeronokkan dengan sains, teknologi, kejuruteraan dan matematik. Minggu Sains juga diharap dapat memberikan inspirasi kepada para pelajar untuk mengambil pengajian dan kerjaya dalam bidang sains, teknologi, kejuruteraan dan matematik. ■





Asian and Oceanian High School Students' Forum 2018 'Discussion and Cooperation With The World'

Asian and Oceanian High School Students' Forum 2018 'Discussion and Cooperation with The World' bertujuan untuk membina keupayaan pelajar daripada Sekolah Menengah Wakayama, Jepun serta 20 negara Asia dan Oceania untuk melihat perkara-perkara dari perspektif global dengan bertukar-tukar pendapat antara satu sama lain mengenai topik seperti isu global, pelancongan dan budaya. Selain itu, melalui forum ini para pelajar berpeluang untuk menyampaikan idea mereka sendiri kepada pihak lain serta forum ini juga bertujuan untuk memupuk kemahiran kepimpinan yang boleh memainkan peranan aktif dalam masyarakat antarabangsa.

Peserta dari negara luar dipilih dari kalangan pelajar sekolah menengah berusia 15 hingga 18 tahun. Sekolah Menengah Yayasan Sultan Haji Hassanal Bolkiah terpilih untuk menghantar seorang wakil pelajar dari Tahun 10 Sains iaitu Muhammad Endy Izz Zakiy bin Muhammad Adiy Osmera dengan diiringi seorang guru untuk mengikuti forum tersebut. Forum tersebut berlangsung dari 11 hingga 16 Zulkaedah 1439 bersamaan 24 hingga 29 Julai 2018 bertempat di Wakayama Prefectural Cultural Hall, Jepun.

Muhammad Endy Izz Zakiy diberi tugas untuk memperkenalkan dan memberi penerangan tentang pelancongan dan kebudayaan Negara Brunei Darussalam serta mewujudkan kesedaran antarabangsa terhadap jenis tarikan di Negara Brunei Darussalam yang masih mengekalkan tradisi tempatan dan alam semulajadi. ■



Lawatan dari Penuntut Wakayama Jepun

Sekolah Menengah YAYASAN Sultan Haji Hassanal Bolkiah mengalau-alukan seramai 15 orang pelajar daripada Wakayama, Jepun dan tiga orang pegawai dari Kedutaan Jepun pada 24 Zulkaedah 1439 bersamaan 6 Ogos 2018. Delegasi Jepun terdiri daripada 11 orang pelajar perempuan dan empat orang pelajar lelaki. Mereka dialau-alukan oleh Pengetua Sekolah Menengah YAYASAN, Madam Chong Li Chen.

Para pelajar Wakayama dipersembahkan dengan persembahan budaya iaitu tarian tradisional diiringi dengan persembahan gulingtangan dan hadrah yang disembahkan oleh para pelajar Sekolah Menengah YAYASAN.



Para pelawat juga berkesempatan mengenakan pakaian kebangsaan negara dan seterusnya menyaksikan demonstrasi pemakaian dastar dan juga sinjang yang dikendalikan oleh para pegawai dari Kementerian Kebudayaan, Belia dan Sukan diikuti dengan permainan tradisi yang dikendalikan oleh Jabatan Muzium. Jamuan makanan dan kuih tradisional juga dihidangkan kepada mereka.

Program lawatan ini antara lain bertujuan untuk memberi peluang kepada para pelawat bagi mencuba dan menyaksikan dengan lebih dekat lagi akan kebudayaan Negara Brunei Darussalam, seterusnya membantu mempromosikan pertukaran budaya di antara Negara Brunei Darussalam dan Jepun. ■





Sekolah Menengah Yayasan Sultan Haji Hassanal Bolkiah menerima jemputan daripada Jabatan Muzium, Kementerian Kebudayaan, Belia dan Sukan untuk menyertai Pameran Seni sempena Sambutan Ulang Tahun Puja Usia Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam ke-72 tahun.

Pameran Seni diadakan pada 30 Zulkaedah 1439 bersamaan 12 Ogos 2018 bertempat di Galeri Seni Dermaga Diraja, Bandar Seri

Begawan. Sekolah Menengah Yayasan diwakili oleh dua orang pelajar dari Tahun 9 Arts 1 iaitu Sarah Umainah binti Awang Ramli dan Fatimah Al-Audadi binti Abdullah.

Sebanyak 10 institusi pendidikan menyertai pameran tersebut, diantaranya ialah Maktab Duli Pengiran Muda Haji Al-Muhtadee Billah, Kolej Pengajian Siswazah Antarabangsa (IGS) dan Sekolah Menengah Chung Hwa.

Para pelajar mengambil masa kira-kira sebulan untuk menyelesaikan hasil karya

Pameran Seni Reggata

seni masing-masing. Karya seni pelajar pertama adalah lukisan hitam dan putih Al-Marhum Sultan Haji Omar 'Ali Saifuddien Sa'adul Khairi Waddien semasa Regatta dan karya seni pelajar kedua adalah lukisan Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam dan Duli Yang Teramat Mulia Paduka Seri Pengiran Muda 'Abdul Mateen semasa berkenan menyertai Regatta. Kedua-dua karya seni dicat dengan cat akrilik di atas Kertas khas.

Pameran ini memberikan pengalaman yang berharga kepada pelajar-pelajar kerana mereka dapat bertemu dan memperlihatkan karya seni mereka kehadapan majlis Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam. ■

Lawatan Sambil Belajar ke Pusat Sejarah Brunei

Semasa lawatan, para pelajar diberi taklimat oleh Ketua Pegawai Sejarah tentang kepentingan Perlembagaan 1959 dan bagaimana perlembagaan ini dapat mengubah Kerajaan Brunei sehingga hari ini.

Pusat Sejarah Brunei ditubuhkan pada 26 Januari 1982 atas titah perkenan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam melalui Memorandum Menteri Besar Brunei. ■



Pada 19 Muharam 1440 bersamaan 29 September 2018, seramai tujuh orang pelajar Sekolah Menengah Yayasan Sultan Haji Hassanal Bolkiah yang mengambil mata pelajaran Sejarah dari Tahun 9, 10

dan 11 telah dijemput untuk melawat dan menyaksikan Galeri Perlembagaan Brunei 1959 yang baru dilancarkan di Pusat Sejarah Brunei. Para pelajar telah diiringi oleh dua orang guru dari Jabatan Kemanusiaan.

Bulan Mata Pelajaran Matematik

Perasmian bulan mata pelajaran Matematik dilancarkan pada 22 Zulkaedah 1439 bersamaan 4 Ogos 2018 bertempat di Dewan Sekolah Rendah Yayasan dan dihadiri pelajar dari Tahun 1 dan Tahun 2. Aktiviti yang dilakukan sepanjang bulan mata pelajaran Matematik adalah pengajaran dan pembelajaran melalui permainan yang hanya dijalankan semasa waktu pembelajaran Matematik.

Aktiviti penutup bulan mata pelajaran Matematik diadakan dengan pertandingan akhir kuiz Matematik bagi pelajar Tahun 5. Acara diadakan pada 18 Zulhijjah 1439 bersamaan 30 Ogos 2018 bertempat di Dewan Sekolah Rendah Yayasan. Aktiviti bertujuan untuk meningkatkan kecerdasan pelajar berfikir dan menjawab soalan Matematik secara spontan.

Acara tersebut dihadiri oleh Cikgu Hajah Mariam binti Haji Ladi, Pengetua Sekolah



Rendah Yayasan yang seterusnya juga menyampaikan hadiah kepada pemenang-pemenang pertandingan akhir kuiz Matematik.

Tampil juara pertandingan tersebut ialah dari Tahun 5 Satur yang diwakili oleh Mohammad Arfan bin Haji Mohammad Ibrahim, Muhammad Fa'eq bin Abdullah Soefri dan Nur Zahra Zakiah binti Haji Kassim. Naib Juara pula pelajar dari Tahun 5

Jupiter diwakili oleh Muhammad Azri Hazmi bin Hanafi, Muhammad Ilyas bin Ilham Rohaidi dan Muhammad Furgan Al Rifti Arif Rahman. Sementara di tempat ketiga pelajar Tahun 5 Venus diwakili oleh Muhammad Ameer Danysh bin Mohammad Irwan, Muhammad Syazwan Syahmi bin Haji Anifa Nazree dan Tuan Mohamed Nishard Azeez.

■





Melestarikan Budaya Brunei

TASKA Yayasan Sultan Haji Hassanal Bolkiah mengadakan Majlis Melestarikan Budaya Brunei pada 9 Zulkaedah 1439 bersamaan 21 Julai 2018 bertempat di Dewan TASKA Yayasan.

Tetamu Kehormat Majlis ialah Pengerusi Persatuan Ibumapa dan Guru (PIBGI), Dato Paduka Haji Shofry bin Haji Abdul Ghafor.

Majlis dimulakan dengan bacaan Surah Al-Fatiha dan kemudian diikuti dengan nyanyian lagu kebangsaan dan lagu Sekolah 'Long Live Yayasan Sultan Haji Hassanal Bolkiah'. Ucapan kata alu-aluan disampaikan oleh Pemangku Pengetua Taska, Cikgu Datin Hajah Zainab binti Haji Abdul Wahab.



Acara diteruskan dengan persembahan tarian tradisi Brunei 'Anding Dida' oleh murid-murid Taman Asuhan 3. Tayangan video mengenai sopan santun juga ditayangkan kepada murid-murid TASKA. Pameran dan demonstrasi seperti permainan, alat muzik,

makanan dan masakan serta pakaian tradisi Brunei memberikan pendedahan awal kepada kanak-kanak dalam melestarikan budaya Brunei. ■

Majlis Sambutan Ulang Tahun Puja Usia Hari Keputeraan Kebawah Duli ke-72 Tahun



Seramai 559 orang kanak-kanak daripada Taman Asuhan Kanak-Kanak Yayasan Sultan Haji Hassanal Bolkiah telah menghadiri Majlis Sambutan Ulang Tahun Puja Usia Kebawah Duli Yang Maha Mulia Paduka Seri Baginda Sultan dan Yang Dipertuan Negara Brunei Darussalam Kali Ke-72 Tahun pada 11 Zulkaedah 1439

bersamaan 23 Julai 2018 bertempat di Dewan TASKA Yayasan.

Hadir selaku tetamu kehormat majlis ialah Cikgu Noorhaizamdin bin Haji Mohd Mosbi, Ketua Pegawai Eksekutif Sekolah Yayasan Sultan Haji Hassanal Bolkiah.

Acara dimulakan dengan bacaan surah Al-Fatihah yang diketuai oleh Cikgu Muhammad Nazmi bin Puasa, diikuti dengan nyanyian Lagu Kebangsaan dan Lagu Sekolah. Acara diteruskan dengan sesi penerangan dan tayangan video mengenai acara-acara keramaian yang diadakan untuk memeriahkan Sambutan Ulangtahun Hari Keputeraan yang diadakan setiap tahun oleh Cikgu Muhammad Edie Fakhri Ajun bin Abdullah, Guru Kanan Kokurikulum I.

Acara kemuncak ialah perarakan membawa tanglung yang dibuat khas oleh kanak-kanak TASKA dan diakhiri dengan penyampaian hadiah bagi pemenang pertandingan membuat Poster (Kg 1), Kain Rentang (Kg 2) dan Pintu Gerbang (Kg 3) yang disampaikan oleh tetamu kehormat majlis.

Tujuan aktiviti ini diadakan bagi menyemai nilai patriotik dalam diri setiap kanak-kanak sebagai usaha mentaati Raja selaku 'Ulu Amri' dan memupuk semangat dan sifat sayangkan kepada Raja dan negara. ■





**Meningkatkan
Kualiti Kehidupan serta
Kecemerlangan
Sosiobudaya dan
Sosioekonomi.**

VISI

MISI

Menguruskan Amal Jariah
Kebawah Duli Yang Maha Mulia
Paduka Seri Baginda Sultan
Haji Hassanal Bolkiah
Mu'izzaddin Waddaulah
dan Ahli Keluarga Baginda
secara Profesional, Cekap dan
Penuh Dedikasi untuk:

Meningkatkan Kualiti Kehidupan

Melalui Pemberian Bantuan dan
Sumbangan Kepada Rakyat yang
Memerlukan.

Memajukan Masyarakat

Melalui Kerjasama dengan Agensi
Kerajaan dan Bukan Kerajaan.

Mewujudkan Masyarakat

Yang Memiliki Nilai Jati Diri yang Tinggi
Sejajar dengan Prinsip Melayu Islam
Beraja.

Memberikan Pengiktirafan

Kepada Sumbangan Rakyat yang
Cemerlang dalam Beberapa Bidang
Khusus.

